

# Қайнонанинг севимли қизи

Ҳар бир қиз катта ҳаёт остонасида, мен, албатта, баҳтли бўламан, турмуш ўртоғимнинг севимли ёри, қайнона-қайнотамнинг ардоқли қизи бўламан, деб ният қилади. Келинларнинг янги оиласа мослашувида, оила аъзолари билан яхши муносабат ўрнатишида қайноналарнинг ўрни катта.

Қайноналарнинг ёш келинчакка меҳр кўрсатиб, камчиликларини тўғрилаб, чиройли насиҳат билан хатоларини кечиришлари улуг фазилатлардан. Зеро, Аллоҳ таоло Оли Имрон сурасининг 134-оятида бундай марҳамат қилган: “**Улар** (мазкур тақводорлар) **Фаровонлик ва танглик кунларида ҳам хайр-садақа қиласидиган, ғазабларини ютадиган, одамларни** (хато ва камчиликларини) **афв этадиганлардир.** Аллоҳ эзгулик қилувчиларни севар”.

Ота уйида эмин-эркин, эрка бўлиб ўсган қиз янги оиласа кўпроқ ширин сўз ва эътиборга муҳтож бўлади. Биз қайноналар бир умр хонадонимиз файзи бўлиб, хизматимизни қиласидиган келинларимизни бағрилизга босиб “болажоним” дейишга нега ийманамиз? Ахир қизларимиз келиб ҳар кун, ҳар доим келинимиздек хизматимизни қиломайди-ку!

Қизлар келин бўлиб тушган уйида қайнона-қайнотаси, турмуш ўртоғидан меҳр кўрсин! Хонадонимизни саранжом-саришта қилиб, пишир-куйдир қиласидиган келинларга ёрдамлашиб, кўмаклашиб юборсак, қийналганида қўлласак, қизнинг ўринини келин ҳам боса олади. Онасини севгандек сизга меҳр қўйиб, сиз туфайли оиласини қадрлай бошлади. Биз қайноналар иззатни жойига қўйсак, келинлар ҳам ҳурматимизни ўз ўрнига қўйишни ўрганади. Тарбия катталардан бошланади.

Маҳалламиизда ибратли қайноналар кўп. Жумладан, маҳалламиз фаоли Мехрихон ая фарзандларини гўзал тарбия қилиб, бир ҳовлида аҳил-иноқ етти келиннинг боши-

ни қовуштирган. Бирор маротаба қўшниларга келинларидан шикоят қилганларини эшиитмаганмиз. Ажрим ёқасида турган ёш келин-кўёвлар билан сухбатга борганимизда қайноналарнинг гап-сўзларини эшитиб ҳайрон қоламиз. Ваъз-насиҳат эшитишга тоқат қилмай, қайсарлик билан нуқул келинини айблайди. Шу боис Меҳрихон ая: “Ажримларнинг кўпайишига оилалар бошликлари айбдор. Улар фаҳм-фаросат билан иш тутиб, ёшларни йўлга солишлари лозим”, деб кўп такрорлади.

Азиз қайноналар! Ҳаётимизнинг давомчилари бўлган келинларимизни ўқитайлик, билмаганларини ўргатайлик. Зеро, улар ўз билими, салоҳияти билан зурриётларимизни тарбиялаб, вояга етказади. Чунки яхши амаллар аёл кишини зийнатлайди, янада гўзал ва назокатли қилади. Шу билан бирга, келинлар ҳам қайнонанинг гапларига қулоқ солиб, улар билан хушмуомала бўлишлари талаб этилади.

Юртимизда аёл-қизларимиз фаровон ҳаёт учун курашнинг олдинги сафларида бўлиши, иқтисод, фан-маданият, тиббиёт ва бошқа барча жабҳаларда биринчилардан бўлишлари учун кенг шароитлар яратилмоқда. Биз қайноналар ҳам наслимиз давомчилари, айниқса, келинларимизни қўллаб-куватлаб, баҳтиёр яшаши учун фидойи оналар бўлайлик! Келинларимиз бизнинг суюкли қизларимиз бўлсин.

**Роҳила ЖУМАЕВА,**  
Вобкент тумани “Хайробод”  
маҳалласи отинойиси



# ШУ ВАТАНГА

## БОРДИР КЕРАГИМ...



Ватанни севиши шу қадар улуғ түйғуки, уни ҳеч бир сўз ила ифодалаб бўлмайди. Дунёга донг таратган Имом Бухорий, Имом Термизий, Абу Лайс Самарқандий, Бурхониддин Марғиноний, Абу Муин Насафий, Қаффол Шоший каби буюк боболаримиз Ватанга кучли муҳаббатлари туфайли таҳаллусларини киндик қонлари тўқилган юртномига боғлаганлар.

Ватанни ҳимоя қилиш ҳам асл фарзандлар бурчидир. Шундай улуғ түйғуни қадрлаб, юртнинг тинчлиги, осудалигини сақлаш йўлида хизмат қилиб келаётган фидойи қизларимиздан бири Камола Авазовадир. У транспорт ва туризм объектларида хавфсизликни таъминлаш билан шуғулланади. 14 январь – Ватан ҳимоячилари куни билан уни табриклаб, суҳбатга чорлаганимизда, ўз фикрларини қўйидагича ифода этди:

– Улуғларимиз Ватанга муҳаббат оиласдан бошланади, деганлар. Ватанни ардоқлашни мен, аввало, оиласдан ўргангандман. Болалигимдан эшитиб улғайган эртаклар қаҳрамонлари каби мард, жасур бўлишни орзу қилдим. Aykido, taekwondo каби спорт турлари билан шуғулландим ва Ўзбекистон биринчилигини қўлга киритдим. Ана шу ватанпарварлик туйғулари мени ички ишлар тизимида ишлаб, халқимиз осойишталигини сақлашдек шарафли ишга етаклади.

Ижодкорлар оиласида тарбия топганим учунми, шеъриятни, адабиётни севаман. Ҳар гал постда сергак турар эканман, буюк мутафаккир Алихонтўра Соғунийнинг:

– Эшиш энди, Ватан ўғли, мендин насиҳат, Қабул қилсанг, келур бошингга давлат. Ватан асли сенингдур Ўзбекистон, Ўғиздин қолмиш эрди бу гулистон, – деган мисралари мени шижаат билан ишлашга ундайди.

Ўзбекистон – буюк инсонларга замин бўлган юрт. Уни севмаслик, ҳар қарич ерини кўзга тўтиё этмаслик мумкин эмас. Пайғамбаримиз Муҳаммад соллаллоҳу алайҳи ва саллам ҳадиси шарифларида: **“Бир кун муробата (Ватанни ҳимоя) қилиш дунё ва ундаги нарсалардан яхшироқдир”** (Имом Бухорий ривояти), деганлар. Имом Муҳаммад Фаззолий алайҳирраҳма эса: “Ватаннинг ҳам ҳақлари бўлади. Уларнинг биринчиси, Ватанда тинч-хотиржам, шукр қилиб яшашидир. Шунингдек, Ватандан кетганда уни соғиниш, Ватанга ҳужум қилинганда уни ҳимоя қилиш ҳам Ватаннинг ҳақларидандир. Жаннатмонанд Ватанда яшяяпмизми, бунга шукр қилайлик, илм излабми, тижорат мақсадидами, Ватандан сафар қилдикми, уни соғинайлик”, деган.

Улуғ аждодларимизнинг ҳикматли гапларини ўқиганимда Ватанимиз тинчлигини сақлаш йўлида хизмат қилаётганимдан, шу Ватанга керакли эканимдан фахрланиб кетаман. Рост-да, киши дунёга келдими, у эл корига ярайдиган, юртим деб яшайдиган инсон бўлиши керак! Ватанини арзимаган дунё матоҳига алмаштириб кетадиган ватанфурушлардан ҳазар қиласман! Аллоҳ ҳамиша юртимнинг, халқимнинг корига ярайдиган инсонлардан қилсин!

Юртимизнинг фидойи инсонларидан бирининг, яъни Камоланинг гапларини тинглар эканман, “Шу Ватанга бордир керагим!” деб тўлқинланиб айтган сўзлари ҳар бир ватандошимиз онгу шуурини ёритиб юборишини истадим. Ва, албатта, шундай бўлишимиз керак ҳам!

**Чарос ПАРДАЕВА ёзib олди.**



# Мұндандағы жаңылар



## Отинои минбари

Қайнонанинг севимли қизи ..... 1

## Муқаддас бурч

Шу Ватанга бордир керагим... ... 2

## Бир оятнинг маънолари

Муросаю мадора

ажрашишдан афзалдир.....4

## Ёмонликдан қайтариш

Исроф кибрға,

кибр ҳалокатга бошлайди.....7

## Саҳобиялар ибрати

Аёллар хатибаси.....8

## Эътиқод дурдоналари

Гуноҳкорни коғирға чиқарувчига

раддия боби .....14

## Билимсизликнинг давоси

Қарғиши уриши ростми? .....16

## Иймондан айрмасин

Секталар издошларини

алдайдилар .....20

## Гўзал башоратлар

Она соғлом – жамият соғлом ....22

## Farzandingizga o'qib bering...

U zotning so'zlarini

yaxshi ko'raman.....23

## Дунё аёллари

Ирсият соҳаси олимаси.....25

## Ислом ҳимояси

Фарбга тақлид – юртга таҳдид...26

## Ихлос

Она дуоси .....27

## Олий ўрнак

Чин мұхаббат итоатдадир.....28

## Мутолаа

Ўгай она.....30

## Ошхона одоблари

Овқат қачон шифо бўлади? .....32

# Муросаю мадора ажрашишдан афзалдир

**بِسْمِ اللَّهِ الرَّحْمَنِ الرَّحِيمِ**  
 وَإِنِ امْرَأٌ خَافَتْ مِنْ بَعْلِهَا نُشُوزًا أَوْ إِعْرَاضًا فَلَا جُنَاحَ عَلَيْهِمَا  
 أَنْ يُصْلِحَا بَيْهُمَا صُلْحًا وَالصُّلُحُ خَيْرٌ وَأَحْسِرَتِ الْأَنْفُسُ الشُّحُّ وَإِنْ تُحْسِنُوا  
 وَتَتَقْوُا فَإِنَّ اللَّهَ كَانَ بِمَا تَعْمَلُونَ خَبِيرًا



Аллоҳ таоло марҳамат қилади: «Қайси бир хотин эридан (унга нисбатан) кўнгилсиз бўлиши ёки унинг воз кечишидан қўрқса, ўрталарини ислоҳ қилиб олишларида уларга гуноҳ йўқдир. Сулҳ (ажралишдан) яхшироқдир. Нафсларга баҳиллик (қизғанчиқлик) битилган. Агар (хотинларингизга) яхшилик (чиройли мумомала) қилсангиз ва тақволи бўлсангиз, албатта, Аллоҳ қилаётган ишларингиздан хабардордир (яъни ажрини берур)» (*Нисо сураси, 128-оят*).»

Ойша розийаллоҳу анҳодан ривоят қилинади: “Ушбу ояти карима эри у билан узоқ яшашни истамайдиган, турли баҳоналар ахтариб, ундан ажрашмоқчи бўлаётган аёл ҳақида нозил бўлган” (*Аҳмад ибн Воҳидий Найсобурий, “Асбоб ан-нузул”*).

Имом Бухорий раҳматуллоҳи алайҳнинг ривоят қилишича, ояти каримада аёл муросаю мадора йўлини танлаб, фарзанд туғиб бериш иштиёқида бўлса-да, аммо эри уни ёқтирмаса, шунда унга: “Мени талоқ қилманг, сиздан бошқа суюнчим йўқ”, дейдиган нозик хилқат эгаларининг шаъни ҳимоя қилинган (*Аҳмад ибн Воҳидий Найсобурий, “Асбоб ан-нузул”*).

Ояти каримада келган “баъл” сўзи эр деган маънони англатади. Шу билан бирга, лалми ерга нисбатан ҳам мазкур сўз ишлатилади. “Нушуз” эса эрнинг хотинига жафо

қилиши, нафака ва яшаш жойидан маҳрум этиши, меҳр-шафқат кўрсатмаслигидир. Айрим ҳолларда жеркиб бериши ёки уришини ҳам ифодалайди (*Имом Замахшарий, “Кашибоф”*).

Ояти каримадаги “шухҳа” сўзи баҳиллик, қизғанчиқлик, хасислик каби маъноларни англатади. Демак, нафс қизғанчиқ қилиб яратилган. Шу боис у доимо ўзини ўйладайди. Аллоҳ таоло инсонга “нафс” деб аталувчи бир хислатни бериб қўйганки, у фақат роҳат-фароғат, шахсий манфаатни жалб қилади, баҳиллик, ҳасад, кўролмаслик каби салбий сифатлар унда мужассам. Инсон бутун умр ўз нафси билан курашиб ўтади. Шу кураши сабабли ажру савоб ва улуғ мартабаларга эришади. Оятда нафснинг энг ашаддий жиҳатларидан бири бу – баҳиллик бўлиб, у оиласий можароларнинг асосий сабаби қилиб кўрсатилмоқда. Мана шу баҳилликни енгган одам оиласада хотиржамликка, ҳаётда фаровонликка эришади.

Оила жамиятнинг ажралмас бўлаги бўлиб, қатъий қонун-қоидаларга асосланади. Наслнинг соғлом, солих ва бардавом бўлиши, шу тариқа жамиятнинг таназзулга учрамаслиги учун Аллоҳ таоло уни Ўз ҳимоясига олган ҳамда унинг биринчи омили сифатида муросаю мадора қилишни белгилаб берган.



Ҳадиси шарифда: “Мўмин (эр) одам мўмина (хотини)га ғазаб қилмасин. Агар у (аёл)нинг хулқидан бири ёқмаса, бошқаси ҳурсанд қиласди”, дейилган (Имом Бухорий ривояти).

Муҳаббат, раҳмат, меҳр-шафқат каби хислатлар оиланинг таянчидир. Бу борада ҳазрат Умар розийаллоҳу анхунинг хотинини ёқтиргмагани учун талоқ қилмоқчи бўлган кишига айтган сўзлари жуда муҳим: “Холинггавой! Оилангни муҳаббатдан бошқа нарсалар устига қурдингми? Риоя қани, уят қаерда қолди?”

Эътибор қилинса, ҳазрат Умар розийаллоҳу анху танбеҳидан оила қуришдан мақсад ҳавои нафс эмас, балки солиҳ фарзанд – насл қолдириш, Аллоҳ амрига мувофиқ жуфт бўлиб яшаш экани маълум бўлмоқда.

Баъзи эркакларнинг арзимас нарса боис хотинини уриши ва қуракда турмайдиган сўзлар билан ҳақорат қилиши кишини ташвишга солади. Арзимас айб топиб, фарзандларингиз онаси, кечалари ухламай бола катта қилган, саҳар туриб уйингизни супурган, кийимингизни тозалаб, сизга ширин таомлар тайёрлаб берган заифа аёлга ғазаб қиласизми? Албатта, аёл кишининг айби бўлиши мумкин. Хатолар такрорланмаслиги учун унга яраша шароит яратиб бериш эркак кишининг вазифаси эканини унумаслик лозим.

Ҳадиси шарифда: “Яхшиларингиз (аёлларни) ҳеч қачон урмайдиганингиз”, дейилган (Имом Ибн Можа ривояти). Расулуллоҳ соллаллоҳу алайҳи ва саллам мусулмонларни аёlinи уришдан қатъий қайтарганлар. Бундан аён бўладики, мусулмонлар орасида яхшилардан бўлишни истаган ҳар бир иймон эгаси танмаҳрамига нисбатан фақат мулоим, меҳрибон ва вафодор бўлишга интилиши лозим.

Нисо сурасида: «...Улар билан тотув турмуш кечирингиз. Агар уларни ёмон кўрсаларингиз, (билиб қўйингки,) балки сизлар ёмон кўрган нарсада Аллоҳ (сизлар учун) кўпгина яхшилик пайдо қилиши мумкин» (19-оят), деб амр қилинган.

Мухтасар айтганда, мўмин киши аёlinи қадрлаши, у билан муросаю мадора қилиши, ҳикматларда айтилганидек, уйлангунча иккала кўзини катта очиши, уйлангандан кейин бир кўзини юмиши, яъни аёlinинг хатоларини кечириб яшashi лозим. Шундагина оилалар мустаҳкам бўлади.

**Абдуқаҳҳор ЮНУСОВ,  
Тошкент шаҳар бош имом-хатиби**

## Ҳаловат ибодатдадир

Инсон ҳаётда доимо ҳаловат истайди. Унинг учун ҳаловат эшиги баъзан очиқ бўлади. У ҳаловат эшигини топади ва ҳурсанд бўлади.


Ҳаловат эшиги баъзан ёпиқ бўлади. Инсон ҳарчанд қидирмасин, ҳаловат тополмайди. Чунки у ҳаловатни бошқа жойлардан, беҳуда амаллардан ахтарган бўлади.

Инсондаги бу ҳолат ҳақида Ҳасан Басрий раҳматуллоҳи алайҳ бундай деган: “Эй одамлар, ҳаловатни уч нарсадан изланглар! Ҳаловатнинг бири Қуръон ўқишида, бири намозда, бири эса, Аллоҳни зикр қилишдадир”.

Улуғлар ҳеч бир сўзни беҳуда, бежиз айтишмайди. Азиз замондошим! Ихлос билан ушбу солиҳ амалларда бардавом бўлинг! Сизга ҳаловат эшиклари очилиши аниқ.

Аллоҳ таоло барчамизга динда ҳам, дунё ҳаётида ҳам, охиратда ҳам оғият ато айласин...

**Рӯҳиддин АКБАРОВ,  
ЎМИнинг Қашқадарё  
вилояти вакиллиги ходими**





# Ўзингизга равоқурганни...

Розия момонинг оиласи билан борди-келдимиз бор эди. Момо ниҳоятда оқила ва ҳожатбарор эди. У боғлару полизлардан олинган ҳосилни кўпчилик билан баҳам қўрарди. Меваю сабзавотнинг энг сарасини биринчи бўлиб серфарзанд оилаларга тарқатарди.

Момо тарвуз, қовун, қовоқларнинг яхшиларини ҳассаси билан кўрсатиб, кўшнининг ҳаққи эканини таъкидларди. Ҳосилнинг баракаси бир йилга татирди. Розия момо: “Ўзингга ниманираво кўрсанг, бошқаларга ҳам шуни илин”, деган сўзларни кўп такрорларди.

Орада бироз вақт боролмай қолдим. Розия момонинг вафот этганини эшигдим. Йиллар ўтиб, яна шу хонадонга йўлим тушганида дилим оғриб қайтдим. Розия момо ҳаётлик даврида гуркираб турган мевали дараҳтларга касаллик тегиб, боғдан файз кетган эди. Бунинг асл сабабини кейинроқ тушундим.

Момонинг икки ўғли бўлиб, у катта ўғли билан бирга яшарди. Қайноасининг вафотидан кейин катта келин: “Нега энди меҳнатни биз қилиб, роҳатини бошқалар кўриши керак. Ўзимизнинг рўзғоримиз катта, ортганини сотамиз”, деб қўни-қўшниларга яроқсиз, қурт тушган меваларни чиқарадиган бўлиби.



Кейинчалик қўшничилик ҳақини ҳам унтибди. Кўп ўтмай, боғ тароватини йўқота бошлабди, мевалар майдалашиб, кўпига касаллик тушиб, дараҳтлар қуриб кетибди. Полиз экинлари эса парвариш етарли бўлса ҳам, қурт тушиб ичидан ириб кетаверибди.

Аллоҳ таоло Қуръони каримда марҳамат қиласи: «**Эй иймон келтирганлар! Ўз қўл меҳнатингиз ва Биз сизлар учун ердан чиқарган нарсаларнинг яхшиларидан эҳсон қилингиз!** Ўзингиз фақат кўзингизни чирт юмиғина оладиган даражадаги ёмон нарсаларни (эҳсон қилишга) танламангиз! Шунингдек, билингизки, албатта, Аллоҳ ғаний ва мақтовга лойиқ Зотдир» (*Бақара сураси, 267-оят*).

Раббимиз ҳар бир инсонга мол-дунё беради ва уни қандай йўлларга сарфлашини синаб кўради. Кўлидаги молу давлатини Аллоҳ таоло берганини иқор қилиб, ундан мискин ва фақирларга ҳам насиба ажратган кишиларнинг молига барака беради ва уни янада зиёда қиласи. Аксинча, давлатманд бўлатуриб, закот ва садақа бермаслик, фақир ва мискинларнинг ҳақини ажратмаслик шариатимизда бахиллик деб аталади ва у қаттиқ қораланади.

**«Суйган нарсаларнингиздан эҳсон қилмагунингизгача сира яхшилика (жаннатга) эриша олмайсизлар. Ниманики эҳсон қилсангиз, албатта, Аллоҳ уни билувчиидир»** (*Оли Имрон сураси, 92-оят*).

Менга қадрдон Розия момонинг ўйтларини, тутумини олмаган, хонадоннинг файзини кетказган келиннинг қилмишлари бахилликнинг бу дунёдаёқ ёмон оқибатларга олиб келишини эслатиб юборди.

**Мунира АБУБАКИРОВА,**  
Ўзбекистон мусулмонлари идораси  
мутахассиси



# Исроф кибрга, кибр ҳалокатга бошлайди

Аллоҳ таоло биз бандаларига берилган ҳамма нарсаларнинг ҳисоб-китоби борлиги ҳақида огоҳлантиради. Агар икки дунё саодатини истасак, умримизнинг ҳар бир куни ғаниматлигини англаб, жамият, оила ва фарзандларимизга наф келтиришга интилиб яшайлик!

Зотан, Пайғамбаримиз алайҳиссалом: “Енглар, ичинглар, садақа қилинглар, аммо исрофгарчилик ва фахрга ўтманглар”, деганлар (Имом Насоий ривояти).

Бинобарин, кийиниш борасида мода ортидан қувиб, кўр-кўrona кийим-кечаклар сотиб олиш исрофгарчилик ва такаббурликка олиб боради. Айрим аёллар кундалик турмушида ғанимат вақтини манфаатсиз ишларга сарфлайдилар. Тўй-тантаналарга янги кўйлак сотиб олиш билан овора бўладилар. Янги машина, уй безаш, янги мебель олишини урф-одатга айлантириб юбормоқдалар. Улар кундан-кунга улғайиб бораётган, дунё ва ҳаёт ҳақидаги саволлари беҳисоб бўлган болалари билан гаплашишга ҳам вақт топмайдилар.

Тўй-маросимларда турили ҳолатларни кузатамиз: ота-онасининг қурби етмайдиган кийим-кечак, тўй кунига учтадан келинлибоси, буларнинг ҳар

бири фалон пул туради. Яна кимўзарга, қўшнимдан қолишмай деган баҳонада данғиллама тўйхоналарда тўй ўтказишига уринишлар. Бундай хонадонларда тўйдан кейин ота-оналар қарзни узиш ташвишида, оқибатда янги тушган келинга илиқ муомала қилишга кайфиятлари бўлмайди.

Маҳалла хотин-қизлар фаоли, отинойилар билан биргаликда давра сұхбатлари ўтказиб, тўй-маросимларни ихчам ва камчиқим тарзда нишонлашни тушунтириб келмоқдамиз. Аёлнинг тежамкорлиги оила моддий аҳволининг яхшиланишига сабаб бўлади. Чунки оиланинг ички ҳаётини, аввало, аёл бошқаради. Эркак ишлаб топиб келганларини қадрлаб, борнарсани ўрнида ва меъёрида ишлатиш рўзғорга барака киритади. Эркакнинг кўнглини кўтаради, оиласи, ўз ишига муҳаббатини оширади. Борнарсани чиройли қилиб кўрсата билиш, саранжом-саришталик ҳам тежамкорлик билан боғлиқ. Тежамкор аёл ҳеч қачон, ҳеч нарсага муҳтоҷ бўлмайди. Жумладан, исрофга барҳам бериш борасида отинойилар билан олиб борилаётган ишлар натижасида яқинда “Гулистон”

маҳалласида бир тўй олдидан куда томон вакиллари йиғилиб, маслаҳатлашиб олишди. Куёв томон қудаларига мебель олмаслини тайинлади, рўзғор учун зарур буюмларни ўzlари тайёрлаб қўйишини айтди. Тўй жуда чиройли, миллий қадриятларимиз асосида ўтди.



Тўй-маросимларни динимиз таълимотига, миллий қадриятларимизга, урф-одатларимизга суюнган ҳолда ўтказсак, нур устига нур бўлади. Қариндошлик ришталарини мустаҳкамлаш гўзал ахлоқ ва яхши қўшничилик муносабатлари умрингизга умр қўшади. Зеро, инсон Ислом ахлоқи билан яшамаса, миллий қадриятларни ҳурмат қилмаса, ҳаловат топа олмайди.

**Зарафшон МАТЧОНОВА,**  
**Хива шаҳридаги “Гулистон”**  
**маҳалласи отинойиси**

# Аёллар хатибаси

Асмо бинти Язид Абс қабиласининг Абдулхомим ўғиллари хонадонида дунёга келди. У аёллар орасида Пайғамбаримиз алайҳиссаломга биринчилардан бўлиб иймон келтирганлардан эди. Асмо Муоз ибн Жабал розийаллоҳу анҳунинг холасининг қизидир. Ушбу оқила аёл “Байъатур Ризвон”да Пайғамбаримиз алайҳиссаломга байъат қилди.

Ҳадя беришни яхши кўрган Асмо Расуллulloҳ алайҳиссаломга тез-тез егулик ва ичимликлар жўнатиб турарди. Вақти вақти билан Ҳужраи саодатга келиб, муҳтарама оналаримиз билан суҳбатлашарди. Асмо розийаллоҳу анҳо илмга бўлган чанқоқлиги ва равон нутқи билан бошқа саҳобиялардан ажралиб турарди. Шу сабаб саҳobia аёллар жамоаси аёлларга хос масалаларни Расуллulloҳ соллаллоҳу алайҳи ва салламдан мунтазам ўрганиб туриш учун ораларидан вакил қилиб уни танлашди.

Бир сафар Асмо саҳобалар билан бирга ўтирган Пайғамбаримиз алайҳиссаломнинг олдиларига келиб бундай деди: “Ота-онам сизга фидо бўлсин, ё Расуллulloҳ! Мен сизга аёллар жамоасидан вакил бўлиб келдим. Аллоҳ сизни эркак ва аёллар учун Пайғамбар қилиб юборган. Биз сизга ва сизнинг Раббингизга иймон келтирдик. Аёл бўлганимиз учун уйларимизга қамалиб, эркакларнинг кўнгилларини оламиз, фарзандларини қоринларимизда кўтарамиз. Эркаклар эса жума намозини ўқиш, масjidга ва жамоат намозларига чиқиш, касалларни зиёрат қилиш, жаноза-



ларда қатнашиш, бир мартадан ортиқ ҳажга бориш каби имкониятлари билан (савобга эришишда) биздан кўра устундир. Аммо улар ҳаж ёки умра ё душманга қарши отланганларида молларини биз кўриқлаймиз, ип йигириб, уларга кийим тикамиз, фарзандларини тарбиялаймиз. Бу каби ишларимиз билан биз ҳам уларнинг савобларига шерик эмасмизми?”

Асмо розийаллоҳу анҳонинг сўзини охиригача эшитган Расуллulloҳ соллаллоҳу алайҳи ва саллам саҳобаларга: “*Бир хотиндан диний мавзууда сўраладиган нарсаларда бундан ҳам чиройлироқ бирон савол эшитганмисиз?*” дея ундаги жасорат ва равон нутқини мадҳ этдилар. Сўнгра интиқлиқ билан Пайғамбаримиз алайҳиссаломдан жавоб кутаётган Асмо розийаллоҳу анҳога қараб: “*Эй хотин, ях-*



*шилаб тушун ва сени бу ерга жүннатган аёлларга ҳам чиройли англатгинки, бир аёлнинг эри билан гўзал турмуш қуриб, унга ҳурсандчилик бахш этишидаги ажр унинг турмуш ўртоғи эришадиган савоб билан менгdir*”, дедилар (*Ибн Асир, 7/19*).

Ушбу сұхбатдан сўнг Асмо розийаллоҳу анҳога “Аёллар хатибаси” деган унвон берилди.

Саҳобия аёллар ҳам Куръон ўрганиш ва ҳадис тинглашда эркаклар каби Расулуллоҳ соллаллоҳу алайҳи ва салламнинг шахсан ўзларидан таълим олишни исташарди. Асмо розийаллоҳу анҳо аёлларнинг бундай истаги борлигини Расулуллоҳ соллаллоҳу алайҳи ва салламга етказди. Пайғамбаримиз алайҳиссалом бу таклифга рози бўлиб, аёллар учун маҳсус бир кунини ажратдилар. Яна аёллар фарз намозларда Масжиди Набавийга чиқиб, у зотнинг суҳбатларидан баҳраманд бўлишарди. Ҳатто Асмо бинти Язид розийаллоҳу анҳо уйда ҳазрат Ойша розийаллоҳу анҳо бор пайтлари Пайғамбаримиз алайҳиссаломнинг ҳузурларига келиб, хотинларга тааллуқли бўлган нодир саволларни сўраб кетарди. Мадина аёлларининг динни ўрганишдаги бу қадар жидду жаҳдларини қўрган ҳазрат Ойша розийаллоҳу анҳо: “Ансория аёллар қандай ҳам яхшидир! Андиша уларнинг дин ҳукмларини сўраб ўрганишларига асло тўсқинлик қилмади”, деган (*И мом Муслим. Ҳайз боби, 61-бет*).

Дарҳақиқат, Пайғамбаримиз алайҳиссаломга савол сўрашдан тортинган баъзи аёллар ҳам бир бошқа одам орқали сўраттириб бўлса-да, диний масалаларни ўрганишда давом этди (*И мом Муслим. Ҳайз боби, 17-бет*).

Асмо розийаллоҳу анҳо Пайғамбаримиз алайҳиссаломдан 80 та ҳадис ривоят қилган бўлиб, ундан 55 таси И мом Аҳмаднинг “Муснад”и (6/452-461) ва “Кутуби сittta”-

сида келган. Масалан, “*Ким Аллоҳ розилиги йўлида бир масжид қурса, Аллоҳ таоло у кишига жсаннатда бир уй бино қиласи*” (*И мом Аҳмад, “Муснад”, 7/461-бет*); «Пайғамбаримиз алайҳиссалом: “*Сизларга инсонларнинг энг хайрлисинг хабарини берайинми?*” дедилар. Саҳобалар: “Қандай яхши бўларди, ё Расулуллоҳ”, дейишиди. У зот алайҳиссалом: “*Аллоҳ таолони мунтазам зикр қилганларингиздир*”, дедилар. Сўнгра: “*Сизларнинг энг ёмонларингиз ким бўлишини айтами?*” дея сўзларида давом этиб: “*Улар Аллоҳ таоло учун бир-бирини яхши қўрадиган дўстларнинг орасини бузганлар, миш-мишларни келтириб, чақимчилик қиласи*” деб огоҳ этдилар» (*И мом Аҳмад. “Муснад”, 6/459*) каби машҳур ҳадисларни Асмо бинти Язид розийаллоҳу анҳо ривоят қилган.

Саҳобия аёл бир неча ғазотларда қатнашган. Жумладан, Ярмук жангиде чодирни тик тутиб турадиган устун-таёқ билан тўққиз нафар Рум аскарини ўлдиргани ривоят қилинганд. Шунингдек, саҳобия Хайбар жангиде Макка фатҳида ҳам фаол қатнашган. Умрининг охирги йиллари Дамашқда яшаган ва ўша ерда вафот этган.

Пайғамбаримиз алайҳиссаломнинг аҳоблари гўзал одоб ва ҳаё ила биз ғариб умматларга йўлчи юлдуз каби ҳар ишда на-мунадир. Саҳобия аёлларнинг гўзал ҳаё ва ибоси билан бир қаторда дин ҳукмларини ўрганишга бўлган журъат ва матонати таҳсинга сазовордир. Баъзан оиланинг ички масалаларида ҳам эр-хотин бирга келиб, Расулуллоҳ соллаллоҳу алайҳи ва салламга савол беришарди. Шу эътибордан, аёллар ҳам диний масалаларда билмаганларини тортинмасдан сўраб ўрганиши афзал йўлдир.

**Абдувоҳид ЎРОЗОВ**  
тайёрлади.



# Жазоси жуда ӨФИР...



**С**ўнгги йилларда жаҳоннинг барча мамлакатларида 14-34 ёшли ўсмирлар орасида ўз жонига қасд қилиш ҳолатлари ортиб боряпти. Статистик маълумотларга кўра, кунига 3 минг киши, ҳар йили эса 1 млн.дан ортиқ инсон ўзини ўлдиради. Жаҳон соғлиқни сақлаш ташкилоти таҳлилларига кўра, Лотин Америкаси, Араб ва Осиё мамлакатларида суицид кўрсаткичлари нисбатан паст даражада. Ўрта даражага Шимолий Европа, Шимолий Америка, Жануби-шарқий Осиё ва Тинч океанининг ғарбий қисмидаги мамлакатлар киради. Суицид кўрсаткичи Шарқий Европа мамлакатларида юқори. Шу нуқтаи назардан, ривожланган Европа давлатларида мазкур муаммо ўта долзарб ҳисобланади.

Мутахассисларнинг таъкидлашича, ўз жонига қасд қилиш бирданига рўй бермайди. Ўзини ўлдирган ўсмирларнинг 90 фоизи қайсиdir даражада руҳият муаммосига учраганлардир.

Хусусан, бу иллат юртимиз ёшларига ҳам ўз таъсирини ўтказмоқда. Яқинда ижтимоий тармоқда 12 ёшли ўкувчи қиз ўз жонига қасд қилгани ҳақида хабар тарқалди. Илгарироқ эса, 17 ёшли қиз ҳам шундай қилган эди. Бу қарорга келгунича у қизларнинг қалбидаги нималар ўтгани ўзларига аён. Негадир аксар суицид ҳолатлари балоғат остонасидаги ёшларда учрамоқда. Келинг, буларнинг сабабларини ўрганиб кўрамиз:

**Сеҳр-жоду.** Афсуски, бугун шариатимиз қатъий ман этган сеҳр-жоду билан шуғулнаётган кимсалар кўпайиб боряпти. Сеҳр бор нарса. Бақара сурасининг 102-оятида Аллоҳ таоло Бобил шаҳрига Ҳорут ва Морут номли икки фариштани синов тариқасида туширгани, улар: «**Биз фақатгина синов (воситаси) миз, (бизга ишониб) коғир бўлиб қолма!**» деб огоҳлантиргани баён этилади.

Шариат ман этган ҳар бир нарсанинг замирида улкан ҳикмат мужассам экани бугун яна ҳам яқолроқ намоён бўлмоқда. Биргина мисол, Ислом таълимотида бехуда суратга тушавериш дуруст эмаслиги айтилади. Бугун аксарият сеҳргарлар одамларнинг суратига қараб, уларни жоду қилишмоқда. Шундай экан, бехуда суратга тушиб, тарқатвермаслик зарур.

**Бузғунчилар таъсирига тушиб қолиш.** Муқаддас динимизга ёт ғоялар тарғиботчилари ёшларни сеҳр-жоду орқали ўз сафларига қўшишмоқда. Бу жараёнда уларга ёшларнинг ижтимоий тармоқларга қўяётган суратлари қўл келаётганини ҳеч ким инкор этмайди. Шу боис суратларни ижтимоий тармоқларга бехуда қўйишдан эҳтиёт бўлиш керак.

**Фарзанднинг қаровсиз қолиши.** Ота ёки она ёхуд иккисининг ҳам йўқлиги бола руҳиятига салбий таъсир кўрсатади. Айни балоғат ёши қиз боланинг ўта нозик даври бўлиб, ҳам жисмоний, ҳам руҳий томондан ўзгаришлар бўлади. Индивидуал феъл-атвор шаклланади. Кайфияти тез-тез ўзгариб, қайсар, ўжар, тажанг бўлиб қолади. Бу даврда қиз бола онасининг қўллаб-қувватлаши, эътибори ва маслаҳатига муҳтоҷ бўлади. Қизларга алоҳида меҳр билан муносабатда бўлиш ҳақида Расулуллоҳнинг кўрсатмалари ҳам бор. Оналар донолик билан қизларига сирдош бўлиб, ёрдам беришлари зарур.

**Руҳиятдаги ўзгаришлар.** Қиз болалар ҳиссиётга бериувчан бўлгани учун улар кўп тушқунликка (депрессия) тушадилар. Бунинг асосий сабаби, бекорчилик, бемақсад яшаш, организмда гормонлар, моддалар алмашинувиdir. Шу даврда онадан сезгирилик талаб қилинади. Олимлар банда мусибат, синовларга дуч келганда ҳадисларда айтил-



ган “Йа Ҳалийму йа Алийм, йа Алиййу йа Азиим” дуосини ўқиб, сўнг Раббимиздан астойдил ва чин ихлос билан ҳожатларини сўраса, иншоаллоҳ, У Зотнинг изни билан мушкули осон бўлади, дейишган.

Ота-она ўз фарзандини эшитмаслиги, у билан самимий сухбатдош бўлолмаслиги ёмон. Турли ижтимоий қатламлардан чиққан боланинг тенгдошлари олдида ўқсиб қолишининг сабаби, оиласиий низо ва босимлар, қўпол муносабат ҳамда беписанд мумомала, пировардида номукаммалликни ҳис этиб, шу каби туйғуларни енгиб ўтолмаслик, муаммолар олдида ожиз қолишидир. Асосийси, масалани ташқаридан ҳал этишга киришилмасдан, ичкаридан туриб асл моҳиятига кирилмаса, ўз жонига қасд қилиш кўрсаткичлари кўпайиб бораверади.

**Диний тушунчаларнинг камлиги.** Ўз жонига қасд қилганлар Аллоҳнинг тақдидидан норози, Унинг чексиз илоҳий неъматларига ношукурлик қиласидиган, синовларга сабр қилолмайдиган кимсалардир. Куръони каримда: “**Эй иймон келтирганлар! Мол-мулкларингизни ўргада ноҳақ (йўллар) билан емангиз!** Ўзаро розилик асосидаги тижорат бўлса, у бундан мустасно. Шунингдек, ўзларингизни (бир-бирингизни ноҳақ) ўлдирмангиз! Албатта, Аллоҳ сизларга раҳм-шафқатлидир”, дейилади (*Niso сураси, 29-оят*). Оятдаги “**ўзларингизни ўлдирмангиз!**” жумласи бир неча хил тафсир қилинган: “Бир-бирингизни ўлдиришингиз ўзингизни ўлдирганингиз билан баробардир. Зоро, ҳаммангиз бир динга мансуб кишиларсиз”.

“Ўз жонингизга ўзингиз қасд қилмангиз”. Яъни, ҳаёт қийинчиликларига бардош бера олмай ёки бирор нарсанинг аламига чидаёлмай ўзини ўзи ўлдириш тақиқланмоқда.

Имом Муслим, Имом Термизий ва бошқа муҳаддислар ривоят қилган саҳиҳ ҳадисларда Расулуллоҳ соллаллоҳу алайҳи ва саллам ўз жонига қасд қилиб ўлган кимса қиёматга қадар ўзини ўзи ана шу азоб билан азоблаб ётишидан қаттиқ огоҳлантирганлар.

**Ўткинчи ҳою ҳавас.** Балофат ёшидаги қизларимиз соф ва ишонувчан қалби билан ҳар кимнинг гапига қулоқ солаверадилар. Ўткинчи, алдамчи ҳис-туйғуларни муҳабbat

деб ўйлайдилар. Баъзи қизларимиз соддалиги оқибатида ижтимоий тармоқлардаги ахлоқсиз видеороликлар, бемаъни сериалларнинг беҳаё, енгилтак қаҳрамонларига тақлид қиласидилар. Динимизда севги ва муҳаббат ҳаром ҳисобланмайди. Аммо икки жинс орасидаги ҳаром алоқалар, шаҳвоният ортидан кўрларча эргашиш эмасдир. Буни шариат ҳаром қилган. Икки жинс ўртасидаги алоқа ва муҳаббатнинг ҳалол ечими – никоҳдир. Расулуллоҳ соллаллоҳу алайҳи ва саллам айтдилар: “**Бир-бирини яхши қўрган (йигит ва қиз) иккиси учун (орадаги муҳаббатни зиёда қилишда) никоҳга тенг келадиган** (бошқа нарса)ни топа олмайсиз” (Имом Ибн Можа ва Имом Ҳоким ривояти).

**Ўз жонига қасд қилган кишига жаноза ўқиладими?** Аҳли сунна вал жамоа эътиқодига кўра, ўз жонига қасд қилиш гуноҳи кабира ҳисобланади. Катта гуноҳ қилган киши иймондан чиқмайди, шу эътибордан ўз жонига қасд қилган киши коғир эмас, балки фосиқ бўлади. Фосиқ кишига жаноза ўқилади. Абу Ҳанифа ва Имом Муҳаммад раҳимахумаллоҳ ўз жонига қасд қилган кишига жаноза ўқилади, деган.

Ибн Обидин “Хошияту раддул муҳтор” асарида: “Ўзини қасддан ўлдириган киши ювилиб, унга жаноза ўқилади. Фатво шунгадир», деган. “Фатавойи Қозихон”да, бошқа одамни ўлдириган кишидан кўра, ўз жонига қасд қилган кишининг гуноҳи каттароқдир, дейилган.

Одамлар орасида ўз жонига қасд қилиш ҳолатлари кўпайиб кетишининг олдини олиш мақсадида имом-хатиблар ўзини ўлдириган кишининг жанозасини ўқишмайди. Имом ноиблари ўқишлари мумкин.

Биз оналар фарзандларимиз тарбиясига масъул эканмиз, уларни беътибор қолдирмаслигимиз лозим. Мактабдаги ҳолатидан хабардор бўлиб туриш керак, икки томонлама тарбия ишлари ҳамжиҳатликда олиб борилиши зарур. Кимлар билан дугона бўлаётгани, телевизорда нималар кўраётгани, телефонда кимлар билан гаплашаётганини назорат қилишимиз зарур.

Ёшларимизнинг таълим-тарбиясига янада жиддий ёндашиш барчамизнинг бурчимиздир.

**Робияхон ТОҲИРОВА**





# Отамга мактуб

Одатда, қызлар тарбияси алоҳида эътибор талаб қиласди. Бунда она – тарбиячи, ота эса ҳимоячи бўлади. Ота қизига асло қаттиқ гапирмайди. Ҳатто ҳалқимизда отаси юзига урган қизнинг баҳтсиз бўлиши ҳақида нақллар мавжуд. Шу сабабми, қызлар ва оталар ўртасида сирли парда бўлиб, унда ҳеч бир ҳалқникига ўхшамайдиган ўзбекона удумлар, тушунчалар акс этади. Ана шундай муҳитда тарбия топган қиз отасига тик боқмайди, унга ўй-фикрларини очиқ-ойдин айтмайди. Бундай қызлар учун она воситачи ҳисобланади. Шу каби тарбия топган қызлар миллий адабиётимизда ҳам тараннум этилган. Жумладан, ўтган асрнинг биринчи ярмида яратилган Кумуш, Раъно образини бунга мисол қилиб келтириш мумкин.

Қўлимга тушиб қолган бир мактубда ҳам худди ўшалардек чинакам ўзбек қизнинг кечинмаларига гувоҳ бўлдим.

«Ассалому алайкум, дадажон! Умрингиз узун, соғ-омон бўлишингизни тилайман. Пушти паноҳим, бизга меҳр тўла қўзингиз билан боқиб: “Қизларим, мен сизларни яхши қўраман”, деган сўзингизга: “Биз ҳам, дадажон”, дея жавоб берардик. Аслида сизнинг дарё қадар меҳрингизни ҳис этмаслик, бугун олисда бўлсан-да, мени нечоғлик соғинаётганингизни англамаслик мумкин эмас. Назаримда, биз қизларингиз ва сиз ўртангизда қўринмас нимадир борки, унга дуч келганингизда бутунлай бошқа одамга

айланиб қоласиз. Ўз-ўзидан тилингиз мулоиймлашиб, юзингиздан қулги шуълалари порлайди. Сиз билан телефонда гаплашарканман, кўз ёшим бўғзимга тиқилади. Сизни жуда ҳам соғинганимни ҳис этаман. Ота учун қиз бола мисоли “жони”. Унинг ишончли қўлларда экани, баҳтиёрлиги қалб хотиржамлигига сабаб бўлади. Шукрки, мен сизнинг қалбингизга ана шундай хотиржамликни ҳадя эта оладиган инсон билан тақдиримни боғладим.

Дадажон, назаримда сиз ёшариб бораётганга ўхшайсиз. Мен эса ҳудди аввалгидек кичкина қизалоқ бўлиб, митти қўлларим билан қўлингизни тутмоқдаман. Айтишила-рича, қиз бола қўпроқ отага яқин бўлади, ота қизининг қиёфасида волидаи муҳтара-масини қўради. Шу сабаб бўлса керақ, унга ўзгача меҳр-муҳаббат билан қарайди. Мен ва менинг ортимдан сингилларим ҳам сизнинг бағрингиздан хайрлашиб, ўзга маконларга йўл олишмоқда. Аммо ҳаммамизнинг ҳам асло унумтмайдиган, соғиниб борадиган, бизни қўпроқ ва қаттиқроқ қадрлайдиган манзилимиз – ота уйимиз бор.

Меҳрибон оталар каби орзумиз йўлида бизга барча имкониятларни яратдингиз, аввало ўқитиб, олий маълумотли қилмоқдасиз. Оталар борки, “Қизим ўқиб нима бўларди? Бўйи етса, узатиб юборамиз-да. Ўқиб бизга нимадир берармиди?!“ деган фикрда қизларининг ҳамма орзуларини саробга айлантиришади. Балки биз ҳам



ўқиб, ҳали сизга тузукроқ ҳадя беролмагандирмиз. Шуни ўйласам, ҳеч нарсани миннат қилмай, меҳр-муҳаббат бера олган инсон сифатида сиз том маънодага қаҳрамонсиз. Биз уч қизмиз, баъзи оталар бир қизни ҳам кўп кўради. Ўғил болага насл давомчиси деб кўпроқ эътибор қаратишади. Аммо сиз: “Менинг тилла қизларим!” деб эркалайсиз. Ҳали бирон марта норози бўлганингизни қўрмадик. Агарда дунёдаги ҳамма оталар сиз каби меҳр бера олишса эди, қиз бола учун энг азиз ва мукаррам инсонга айланар эдилар.

Дадажон, сизга энг ширин хотираларимни айта олганимдан шу қадар баҳтиёрманки, худди қарзимнинг денгиздан томчи қадарини уза олгандайман. Яқин қунларда ота уйимга бормоқчиман. Қадрдоңларимни ўйқлаб, сиз билан мириқиб суҳбатлашмоқчиман. Кечагина телефонда: “Қизларим, сизларни жуда соғиндим”, деган сўзингиз менинг бир соғинчимни ўн қадар оширди. Умрингиз узун, тану жонингиз соғ бўлишини тилаб, тез орада дийдорлашгунча, дея қизингиз...»

Пойдевори мустаҳкам бўлмаган, устунлари заиф бўлган қўрғон борки, кун келиб қулаши тайин. Оила ҳам бир қўрғон. Унда ота ва она биргаликда меҳр ва муҳаббатга тўла уй қуради. Дунёдаги оталар ҳам моҳир уста каби ишини охирига етказиши лозим. Оталар шундай меъморки, уларнинг фарзандларига берган тарбияси иморатга solaётган нақшлари кабидир. Нақшлар қанчалар қунт билан қилинса, шунча жилоланади. Фарзандларининг ютуқларига оталар меҳнати сабабдир. Отасидан фаҳрланган ҳар бир фарзанд энг яхши тилакларини ширин сўzlари билан тилда, эзгу ишлари билан амалда намойиш этиши лозим. Зеро, оталар бизнинг тоғларимиздир.

Камола АБДУМАЛИК қизи

## Шукри йўқнинг қадри йўқ

\* \* \*

*Моли билан қеккайган камбағаллашар.*

\* \* \*

*Қўл югурги ошга,  
Тил югурги бошга.*

\* \* \*

*Эчкида эт бўлмас,  
Ёмонда бет бўлмас.*

\* \* \*

*Бекорчининг бети йўқ,  
Қозон осар эти йўқ.*

\* \* \*

*Беташвиш бош қайдада,  
Меҳнатсиз ош қайдада.*

\* \* \*

*Дангасанинг иши битмас,  
Ёз келса ҳам, қиши битмас.*

\* \* \*

*Дарё сувини баҳор тоширап,  
Одам қадрини меҳнат оширап.*

\* \* \*

*Доно — бир жойда,  
Дангаса — ҳар жойда.*

\* \* \*

*Иш қучини елга берма, ерга бер,  
Жамғармани селга берма, элга бер.*

\* \* \*

*Ишнинг қўзини бил,  
Эрнинг — тилини.*

\* \* \*

*Аёлнинг сариштаси —  
Рўзғорнинг фариштаси.*

\* \* \*

*Олис йўл отни синар,  
Оғир кун — хотинни.*

\* \* \*

*Рўзғор зийнати — ўтин,  
Уйнинг зийнати — хотин.*

\* \* \*

*Яхши хотин арпа унни кабоб қилар,  
Ёмон хотин буғдои унни хароб қилар.*

\* \* \*

*Эри суймаганни эли суймас.*

*Наманганлик Хосият онадан  
ёзib олинди.*



**ИМОМИ АЪЗАМ**  
**АБУ ҲАНИФА НЎЙМОН ИБН СОБИТ**

## Гуноҳкорни кофирга чиқарувчига раддия боби

“Ал-фиқҳ ал-абсам” асаридан

(Бошланиши ўтган сонларда.)

**Савол:**

– Бир одам бирор гуноҳни қилган банда кофирдир, деса, унга қарши қандай далил бор?

**Жавоб:**

– Унга бу ояти карималар қарши далил бўлади: «Зуннун (Юнус)нинг (ўз қавмидан) ғазабланган ҳолда (қишлоғидан чиқиб) кетиб, Бизни унга қарши чиқа олмайди, деб ўйлаган пайтини, сўнг (Биз уни балиқ қорнига ташлаганимиздан кейин) қоронғи зулматлар ичра: “Сендан ўзга илоҳ йўқ-дир. Сен (барча) нуқсонлардан покдирсан. Дарҳақиқат, мен (ўзимга) зулм қи-лувчилардан бўлдим”, деб нидо қилган (пайтини эсланг!)» (Анбиё сураси, 87-оят);

«...Эй ота, (Аллоҳдан) бизларнинг гу-ноҳларимизни мағфират қилишини сўранг. Албатта, бизлар хато қилювчи-лардан бўлган эканмиз» (Юсуф сураси, 97-оят), деганлари айтилган.

Бу оялардан билиниб турибдики, Юсуф алайҳиссаломнинг инилари гуноҳкор эдилар, кофир эмасдилар. Юнус алайҳиссалом ўзларига зулм қилган эдилар, кофир эмас эдилар.

Мусулмон кишини кофирга чиқариш ўта хатарлидир. Шу боис динимиз бундай ишдан қаттиқ қайтарган. Расулуллоҳ соллаллоҳу алайҳи ва саллам: «Бирор киши ўз биродарига: “Эй кофир” деса, бу сўз икка-ласидан бирига тегишли бўлади», дедилар (яъни, агар кофирликда айбловчи ҳақ бўлса, айбланувчи кофирлигича қолади. Ба-шарти ҳақ бўлмаса, у ҳолда ўзи кофир бўла-ди) (Ином Бухорий ривояти).

\* \* \*

Ином Мотуридий раҳимаҳуллоҳнинг “Тавҳид” асари VI жузидаги ушбу масала ба-

тафсил баён этилган. Жумладан, у зот бундай ёзади:

«Гуноҳ қилган кишидан “куфр” ва “ширк” деган номларни тўсадиган бир неча далиллар бор. Биринчидан, Аллоҳ таоло ўз Пайғамбарига мўмин ва мўмина аёллар учун истиғфор айтишни буюрди. Зоро, Аллоҳ таоло ширк ва қуфр каби ҳолатлар бўлатуриб, истиғфорга амр қилиши мумкин эмас. Ояти каримада: “Набийга ва мўминларга мушрикларнинг дўзах эгалари экани аён бўлганидан кейин улар учун мағфират сўрашлари дуруст эмасдир” (Тавба сураси, 113-оят), деган».

Дарҳақиқат, Аллоҳ таоло юқоридаги оятда ширк аҳли учун истиғфор сўрашдан, қуйидаги оявларда эса, мунофиқлар учун истиғфор айтишдан қайтарган: «Ортда қолган аъробийлар сенга: “Молимиз ва аҳлимиз бизни машғул қилди, биз учун мағфират сўра, дейишар”» (Фатҳ сураси, 11-оят); “Улар учун мағфират сўрайсан-ми ёки улар учун мағфират сўрамайсан-ми – барибир” (Мунофиқун сураси, 6-оят).

Бундан ташқари, кичик гуноҳлар қилиш инсонни диндан чиқаради деб ҳисоблайдиган хорижийларнинг эътиқоди ҳам пайғамбарлар ва солиҳлар бошидан ўтган синовлар билан рад этилади. Диндан чиқарувчи нарсалар пайғамбарлик ва валийликни кетказди. Ким пайғамбарларга шу тарзда иймон келтирса, аслида у пайғамбарларга кофирдир. Бу (хорижий)лар гуноҳларни шу қадар улуғладиларки, одамларни кофирликда айблай бошладилар. Бунинг ўзи энг катта гуноҳлардан биридир. Бу Аллоҳ таолонинг хукмларида белгилаб қўйилган чегараларни бузган ва Аллоҳнинг динида ҳаддан ошган кимсаларнинг сифатидир.



Бунда мўътазилийларнинг эътиқодига ҳам раддия бўлиб, Аллоҳ таоло пайғамбарларни йўзига дуо ва тазарру қилишлари, қўрқув, умидда бўлишлари ва қилган камчиликлари учун ийғлаганлари, У Зотга ёлворишлари билан сифатлади. Ҳатто уларнинг дуолари ижобат қилинди. Агар уларнинг хатолари учун жазоланиши эҳтимоли ҳикматга кўра бўлмаса ёки уларда бундан жазо хавфи бўлса, бунда ҳаддидан ошиш, (Яратганни) зулм билан сифатлаш юзага келиб қоларди. Бу эса гуноҳдан ҳам ёмонроқдир. Бу мўътазилийларнинг кичик гуноҳлар (ўз-ўзидан) мағфират қилинади ва уларга бериладиган жазо ҳикматга зиддир деган фикрларини, шунингдек, буни қуфр деб ҳисоблайдиган хорижийларнинг фикрларини ҳам рад этади».

Ҳанафий уламолардан Ибн Нужайм: “Агар кофир дейиш учун тўқсон тўққизта далил бўлса-ю, кофир демаслик учун биргина далил бўлса, тўқсон тўққизини қўйиб, ўша бир далилни олиш керак”, дейди.

#### Савол:

– “Аллоҳ таоло ўзи қаерда?” деб сўралса, нима деб жавоб берамиз?

#### Жавоб:

– Ундай савол берган кишига «Аллоҳ таоло бор эди, макон йўқ эди, Аллоҳ таоло оламларни яратмасдан олдин бор Зот, “Қаерда?” ва “Қандай?” деган сўзлар йўқ эди, У ҳамма нарсанинг яратувчисидир», деб жавоб берилади.

(Давоми келгуси сонда.)

## ЭРИНГГА МЕХРИБОНЛИК ҚИЛДИНГМИ, ҚИЗИМ?..

Бахтсизман деб нолима, қизим. Бахтнинг ичидаги турибсан.

Ота-онанг борлиги – баҳт. Уларнинг сенинг ҳаққингга дуо қилишлари минглаб хазинадан афзал.

Турмуш ўртоғинг ёнингда, ўғил-қизларинг бағрингда экани ва уларнинг шодон ўйнаб-кулиб, соғу саломат юришлари чексиз баҳт, агар билсанг! Қара, тирноққа зорлар қанча?! Нолийсан, нимангга етмаяпти?

Турмуш ўртоғингни яхши пул топмайди деб ўйлаганингдан унга яхши муомала қилгинг келмайди.

Димоғинг баланд, кўп нарсани хоҳлайсан, сабринг йўқ, фалончиларга ўхшаб бой-бадавлат эмасмиз, уйимиз оддий, дейсан.

Арзимаган нарсани баҳона қилиб, турмуш ўртоғинг билан жанжал бошлайсан. Лекин нолима, қизим. Уйи йўқлар қанча, ҳали оиласи йўқ, бир уйнинг бекаси бўлишни орзу қилганлар бор. Шукр қил, кўзинг шу гўзал дунёни кўриб тургани учун ҳамд айт, болам. Куёшни, Ойни, шу гўзал оламни, гуллар рангини ҳатто тушларида ҳам кўролмаган кўзи ожизлар қанча.

Нолима, қизим! Ўйлаб кўр, ўзинг оила учун нима қилдинг? Эринг қийналиб топган пулини жой-жойига қўйиб, тежаб-тергаб ишлатдингми?

Эрингнинг муомаласидан норози бўласан. Лекин ўзинг кўчадан чарчаб келганида табассум билан қаршилаб, қўлидан нарсасини олиб, меҳрибончилик қилдингми?

Тафаккур қил, қизим, оиласи эр-хотин бир-бирини қўллаб-қувватлаб, асраб-авайлаши лозим. Шундан ҳаёт гўзал ва фаровон бўлади.

Нолима, қизим! Ўткинчи дунёга берилиб, баҳт уйингни вайрон қилма! Сабр ва шукрда бўлишинг сени баҳт манзилларига етаклайди. Зоро, Аллоҳ таоло: «Ва Раббингизнинг: “Қасамки, агар шукр қилсангиз, албатта, сизга зиёда қилурман. Агар қуфр келтирсангиз, албатта, азобим шиддатлидир”, деб эълон қилганини ҳам эсланг» (Иброҳим сураси, 7-оят), деб марҳамат қилади.

Азизам, оила – муқаддас. Уни асраб-авайлаш ўзингнинг қўлингда. Лекин ҳар нарсада меъёр бўлгани маъқул. Ҳаёт синовларида тобланиб, сабр-қаноат билан баҳтга эришилади.

**Хосият ХУДОЙБЕРДИЕВА,  
Косонсой тумани, “Ровот” маҳалласи отинойиси**





## ҚАРФИШ УРИШИ РОСТМИ?

**САВОЛ:** Фарз намоздан кейин тасбек айтадим. Бундай қилманг дейишиди. У ҳолда қайси вақтда тасбек айтган маъкул?

**ЖАВОБ:** Намоздан кейин тасбекларни маълум ададда айтиш суннат амал ҳисобланади. Тасбеклар беш вақт намознинг фарз ва суннатлари ўқиб бўлинганидан сўнг айтилади.

Намоздан сўнг тасбек айтишнинг савоби улуғдир. Абу Ҳурайра розийаллоҳу анхудан ривоят қилинади. Расулуллоҳ соллаллоҳу алайҳи ва саллам: «*Ким ҳар намоз сўнгиди 33 марта “Субҳаналлоҳ”, 33 марта “Алҳамду лилаҳ”, 33 марта “Аллоҳу акбар” деб, юзинчисини “Ла илâха il-lâ illohu wa-hdâhu la shari’ka lahu, la-hu mulku wa la-hu hamdu wa huwa ‘âlamâ kâlihi shay’in qodîir” деса, гуноҳлари денгиз kўпигича бўлса ҳам кечирилади*», дедилар (Имом Муслим ривояти).

**САВОЛ:** Айрим аёллар намозларини анча кечикириб ўқийдилар. Уларнинг шу ишлари тўғрими?

**ЖАВОБ:** Аллоҳ таоло Қуръони каримда: «*Намоз мўминларга вақти тайин этилган ва (фарз деб) битилгандир*» (Нисо сураси, 103-оят), деб марҳамат қилган.

Намоз вақти кирганидан кейин уни адоқилиш эркак ва аёлга бирдек фарздир. Масалан, пешин намозининг вақти кирса, шу вақтда эркаклар ҳам, аёллар ҳам пешин намозини ўқийдилар. Аёллар вақти кириши билан намозни ўқишилари керак. Бирор узрли сабабсиз намозни кечикириб ўқиш макруҳдир.

**САВОЛ:** Гуруҳлар ёки каналларда ҳар хил видеолар, ҳазил-мутойибалар келиб қолади. Биз у видеоларни очиб томоша қилсан, бу вақт исрофига кириб қолмайдими?

**ЖАВОБ:** Шариатга зид бўлмаган видеотасвирларни кўриш мубоҳ – мумкин бўлган ишлар сирасига киради. Лекин кўп вақтни беҳуда видеолар томошасига сарфлаш вақтни, умрни исроф қилишдир. Мубоҳ ишда меъёрдан ошмаслик, ижтимоий тармоқлардан эҳтиёж миқдорида фойдаланиш, вақтни фойдали ишларга сарфлаш лозим.

**САВОЛ:** Фарз намознинг учинчи ва тўртинчи ракатларида Фотиҳа сурасидан сўнг замсурा ўқиса, саждаи саҳв қилинадими?

**ЖАВОБ:** Фарз намозларининг учинчи ва тўртинчи ракатларида Фотиҳа сурасини ўқиш – суннат амал. Кимдир Фотиҳадан кейин замсурा ўқиб қўйса, бу билан саждаи саҳв вожиб бўлмайди.

Бу борада “Фатавои ҳиндия”да бундай дейилади: “Фарз намозларининг учинчи ва тўртинчи ракатларида Фотиҳа ҳамда замсурা ўқиган бўлса, саждаи саҳв лозим бўлмайди”.

**САВОЛ:** Қизи Қуръонни тугатиб, отонасига бағишлиса бўладими? Агар отона тирик бўлса-чи?

**ЖАВОБ:** Албатта, бўлади. Бу борада мўътабар фикҳий манбаларимиздан бири “Бадоеъус саноеъ” китобида бундай дейилади: “Ким рўза тутса ёки садақа берса ё (нафл) намоз ўқиса ва савобини вафот этган ёхуд тирик инсонга бағишлиса, бу жоиздир ва савоби, аҳли сунна вал жамоага кўра, уларга етиб боради”.



**САВОЛ:** Хоразм вилоятида тўйдан олдин қиз томонга қалин пули берилади. Шу маҳр ўрнига ўтадими?

**ЖАВОБ:** Агар Хоразм худудида маҳр пулни “қалин пули” деб номлаш одат бўлган бўлса, яъни маҳрнинг номи “қалин пули”га айланиб кетган бўлса ва у келиннинг ўзига шахсий мулк қилиб берилса, унда маҳр деб ҳисобланади. Маҳрни аёлнинг розилигигиз ҳеч ким тасарруф қилиши мумкин эмас.

**САВОЛ:** Ёшим 18 да. Рамазон ойида намоз ўқиши бошладим. Кеча витр намозининг 3-ракатида Қунут дуоси эсимга келмай қолди. Шу ҳолатда “Роббана атина...” дуосини ўқиб, намозимни давом эттирдим. Шу намозим дуруст бўлдими?

**ЖАВОБ:** Намозингиз дуруст бўлган. Лекин Қунут дуосини яхшилаб ёд олишингиз керак.

**САВОЛ:** Одамлар орасида “Қарғиш уради”, деган гап бор. Динимизда бу ҳақда нима дейилган? Яъни бир одам бошқа кишини қарғаса, қарғиши тегадими?

**ЖАВОБ:** Қарғиши – ёмон нарса. Бир инсон бошқа кишининг ҳаққига ёмон дуо қилиши қарғишдир. Агар бирор киши мазлум ҳолатда баддуо қилса, дуоси ижобат бўлади.

Расулulloҳ соллаллоҳу алайҳи ва саллам Муоз розийаллоҳу анхуни Яманга юбора туриб бундай деганлар: “*Мазлумнинг дуосидан эҳтиёт бўл. Зоро, унинг дуоси билан Аллоҳ таолонинг ўртасида парда-тўсиқ иўқдир*” (Муттафақун алайҳ).

**САВОЛ:** Бизда асалари боқилади. Асаларига зарар келтирадиган майда жонзотлар борки, уларни дори ёки маҳсус воситалар билан йўқотиб бўлмаяпти. Биз зааркунандалар йўқолиши учун асалари қутиларини оловда куйдирашим. Шу ишимиз жоизми?

**ЖАВОБ:** Озор берувчи жонзотларни оловда ёкиш, куйдериш жоиз эмас, макруҳдир. Аммо бундан бошқа усуллар кор қилмаса, куйдериш билан уларни бартараф

қилиш жоиз бўлади. “Дуррул муҳтор”да қуйидагича келтирилган: “...Лекин жонзотларни ёкиш ва қуидириш жоизлиги “Шархус сияр”да келганидек, бошқа имкон топа олмаган ҳолатларга тегишлидир. Агар бошқа усул билан бартараф қилиш имкони бўлса, қуидириш жоиз эмас”.

**САВОЛ:** 1) Қуёш чиқаётганида намоз ўқиб бўлмайди. Шу вақт қанча давом этади?

2) Баъзида қуёш чиқишига 10-15 дақиқа қолганида турман ва намознинг фарзини ўқиб бўлиб соатга қарасам, қуёш чиқишига 3-4 дақиқа қолган бўлади. Шу ҳолатда ўқилган намознинг хукми қандай?



**ЖАВОБ:** 1) Қуёшнинг гардиши кўринишидан бошлаб 15 дақиқа ўтганигача намоз ўқиб бўлмайди.

2) Намозингиз дуруст бўлади.

Мусулмон киши бир намозни кечиктириб, иккинчисига яқин вақтда ўқищдан эҳтиёт бўлиши керак. Чунки бундай қилиш бора-бора гуноҳи кабирага айланиб қолади. Бу ҳақда Расулulloҳ соллаллоҳу алайҳи ва саллам: “*Сабабсиз икки намознинг вақтини жамлаб ўқиган киши гуноҳи кабиранинг эшигига келибди*”, дедилар (Имом Ҳоким ривояти).

Ким бу ишни узрсиз кўп такрорласа, Аллоҳнинг азобига гирифтор бўлади. Қуръони каримда: «*Бас, шундай намозхонлар ҳолига войки, улар намозларини “унутиб” қўядилар*» (Моъзун сураси, 5-оят), деб огоҳлантирилган.

**Ўзбекистон мусулмонлари идораси  
Фатво маркази.** Тел. (78) 150-33-44



# Асосийси – илмга муҳаббат уйғотиш...

Швециянинг Стокгольм шаҳрида истиқомат қилаётган, ўзбек оиласида камол топаётган ватандошимиз Нафисахон Маҳмудова, ёш бўлишига қарамай, Куръони каримни мунтазам тиловат қиласди. У ҳозир 6 тилда гаплаша олади.

Нафисахон “Болаликда ўйнаб ол. Кейин вақтинг бўлмайди”, деган фикр-ўйдан йироқ. Шиори: “Ёшликда олинган илм – тошга ўйилган нақш. Катта бўлиб, оила қурганингда фарзандларингга берадиган билим ва кўнималарингни ҳозирдан шакллантир. Фарзандга ота-она билим бермаса, ким беради?! Ота-она намоз ўқимаса, бола қайдан ўқиди?! Ота-она Куръон ўқимаса, фарзанддан нимани кутиш мумкин?! Келажакка бугундан тайёрлан”.

Ота-онасининг таълими

ва ўгити сабаб Нафисахон бир неча тилларни ўрганганд. “Кичик ёшимдан тил ўргатиб катта қилишиди. Тил ўрганмоқчи бўлганлар ота-онамдан маслаҳат олишсин”, дейди.

\*\*\*

Юқоридаги тавсифлардан кейин орамизда Нафисахонга меҳри тушмаган киши топилмаса керак. 15 ёшли қизини нафақат тенгкурлари, балки катталарларга ҳам ўrnак қила олган асл қаҳрамон – онаси Жамила Маҳмудова қуйидагиларни сўзлаб берди:

– Турмуш ўртоғим билан фарзандларимиз дунёга келмасидан бурун зикрда бўлдик. Гуноҳ қилмасликка уриндик. Хўжайним тез-тез огоҳликка ундан: “Ёлғон гапириб, фийбат қилиб қўймайлик. Орамизда нохуш сұхбатлар бўлмасин. Бола эшитади”, дерди. Ак-

сар вақтимни Куръони карим тиловати билан ўтказардим. Вужудимдаги гўдак ҳам уни тинглаётгани кўнглимдан ўтарди...

Фарзандим дунёга келганидан сўнг эса, уни асло дуо қилмасдан, Басмалани айтмасдан эмизмас эдим. Шошган вақтимда ҳам бироз тинчланиб олиб: “Қорнингиз очдими, сизни куттиридимми?” дея ўзимни катта одам билан гаплашаётгандай тутардим.

Болалар таълимнинг дастлабки босқичини, асосан, мендан олиши: Куръон ўқиш, тил ўрганиш каби. Дадаларига имтиҳон топшириб туришарди. Яхши ўқиганларини рафбатлантирадик. Дейлик, болада илмга муҳаббат сусайиб қолса, ёд ололмаётган бўлса, шу вақтда бироз дам берардик. Ўзимиз эса: “Фарзандимизни илмга муҳаббатли қилгин”, деб Аллоҳдан астойдил сўрардик. “Бирор гуноҳ қилдикмикин?!?” деб қайғурадик. Кейин боланинг ўзига ҳам: “Илм сўраб дуо қилиб кўринг-чи”, дер эдик. Олимлар ҳаётидан иқтибослар келтирадик. Болага сездирмаган ҳолда уни илмга жалб этардик.

Фарзандларни чўққига олиб чиқиши қийин. Лекин йўналиш берсангиз, бу



ишиňи ўзлари уddалайди. Дейлик, илмга муҳаббатини орттириб, бошланғич таълимни берасиз. Уёғига ўқишиňи ўзлари давом эттиради. Қайсиadir даражада хатоларини тушунишларини истадик. Лекин ҳам масининг ҳам уddасидан чиқолмадик. Бошланғич таълим берилганидан кейин қолганига ўзлари интилишди. Илгарилари: "Дарс вақти бўлди" десак, ҳозир: "Ойижон, дарсимни топшириб олай, қабул қилиб олинг", деб ўзларидан эшитамиз. Авваллари рафбатлантирган бўлсан, эндиликда бизни хурсанд қилишади.

Турмуш ўртоғимни ҳар доим оила раҳбари сифатида кўришини истайман. Дадамиз ҳал қилувчи сўнгги сўзни айтади. Шунга ҳаракат қиласиз ҳар доим, алҳамдуиллаҳ.

Болалар отани раҳбар ўрнида кўриши учун она ҳам астойдил ҳаракат қилиши керак. Отани ўзгалар олдида обрўсизлантирмаслик, ҳурматини сақлаш лозим. Нафақат фарзандларга, балки бошқа бирорга ҳам отадан шикоят қилмаслик керак. Болалар, айниқса, онадан ота ҳақида шикоят гапларни эшитмаслиги лозим. Шунда отанинг сўзи сўз бўлади. Бу услуб боланинг тарбиясини анча енгиллаштиради. Тарбиянинг шу жиҳатига катта эътибор бераман. Отаси ҳам ўз ўрнида болаларим мени ҳурмат қилишини та-

лаб этади. Масалан, устимдан шикоят қилишларига йўл қўймайди. Оиламида кимгадир озгина ҳурматсизлик қилинса, бу ҳолат қаттиқ муҳокама этилади.

Баъзи оилаларда фарзандлар ойнаи жаҳон олдида, она ошхонада – ошовқат билан банд бўлади. Бундай ҳолат бизнинг оилада меъёр ҳисобланмайди. Болалар ҳам, уйда бўлса, отаси ҳам ёрдамлашишади. Шундай бўлганда, болаларда итоат чиройли шаклланади. Болалар ота-онанинг ўзаро муҳаббатини кўриши керак. Ана шу болани хотиржам, бахтни ҳис қилиб ўсишига ёрдам беради. Хотиржам қалбга илмнинг кириши осон бўлади.

Киши камбағал бўлиши мумкин, лекин маънавий қашшоқ бўлмасин. Маънавий қашшоқлик болаларнинг интилишларини тўсиб қўяди. Фарзандларимиз ўқув-курсларига бормоқчи бўлишса, қайси устоз, қайси йўналишни танлаганига эътибор қаратамиз. Ўқув-курсларининг бола дунёқараши шаклланиши, фикрлари ўсиши, имон-эътиқоди мустаҳкам бўлишида ҳам, илмга муҳаббат қўйишида ҳам катта фойдаси бор.

Авваллари болаларнинг режа асосида иш қилишлари назоратимда бўларди. Мактаб кунлари ярим соат, дам олиш кунлари икки соат дарс тайёрлатардим. Буларнинг бари бола мурайян поғонага чиқиб олгу-

ничадир. Кейин унинг ўзи шунга одатланади. Масалан, қизим мактаб кунлари 2-3 соатдан, дам олиш кунлари кун бўйи дарс тайёрлашга интилади. Энди мен режа тузиб беришим шарт эмас.

Аслида боланинг ҳар куни қанча ўқиганига эмас, балки илмга рағбати ортаётганига эътибор бериш керак. Бола илмга муҳаббатни туйсин. Агар мақсад натижа бўлса, асабийлашасиз, болани ҳам, ўзингизни ҳам қийнайсиз. Асосийси, унинг қалбида илмга муҳаббат уйғотиш керак. Шунда мажбуран ўқитилаётган болалардан ўзиб кетади.

Агар унинг ўқишига иштиёқи сусайганини кўрсам: "Овозингизни соғиндиндим-эй. Барibir сизнинг ўқишингиз бошқача-да, менга ёқади" қабилида мақтовлар айтаман. Ёки Нафисанинг ўзига эшиттириб отасига: "Эшитяпсизми, Нафиса ўқияпти. Берилуб ўқийди-я", дейман.

Ҳозир унда илмга иштиёқ кучли. Ўзи режа тузади, ўзи ўқийди. Биздан маслаҳат сўрайди, холос. Отаси қандай китоб ўқиши, қайси устоздан таълим олишини айтиб туради. Ўрнида рафбатлантириб, ўрнида ўйл-йўриқ қўрсатади.

Аллоҳ ҳаммамизга фарзандларимизнинг камолини кўришини насиб этсин.

**Юлдуз АСҚАР**  
қизи ёзиб олди.



# Секталар издошларини алдайтилар

Аллоҳ таоло Қуръони каримда: “Исломдан бошқа динни талаб этган одамдан қилған амаллари қабул қилинмайды ва у охиратда зиёнкорлардан бўлади” (*Оли Имрон сураси, 85-оят*), деб огоҳлантирган.

Бугун секталар алдовига учраб, ҳақ динини ботилга алмаштирган юртдошларимиз, афсуски, кўпаймоқда. Улар бу ишнинг оқибати ҳақида ўйлаб кўрмаяптилар. Мусулмон ҳолда вафот этмай, у дунёга кофир ҳолда кетиш бахтсизликдир.

Хўш, ўзи секта нима?

“Секта” – лотинча сўз, ўзбекчада “мактаб” деган маънени англатади. Ушбу атаманинг моҳияти ўзгариб, диннинг номидан ўз манфаати йўлида фойдаланувчилар “секталар” деб атала бошланди. Мутахассисларнинг таъкидлашича, ҳозирда дунёда секталар сони тахминан 5000 тачадир.

Замонавий воқелик диний-экстремистик характердаги секталарнинг инсонлар онгини эгаллаш учун кураши кучайганини кўрсатмоқда. Секталар, асосан, ёшлар ва моддий аҳволи ночор бўлганлар ичida иш олиб бориш йўли билан ўз тарафдорларни кўпайтиришга ҳаракат қиласди. Бундай секталарга асос солганлар ўз издошларини алдаш йўли билан доимо уларнинг мол-мулкларига эгалик қилишга уринади.

Масалан, Угандадаги “Охират куни” сектаси охиратни 1999 йилнинг 31 декабри-

га “белгилаган”. Ушбу секта раҳбарлари ўз тарафдорларини мол-мулкларини сотиш, тушган маблағни уларга беришга ва шу йўл билан гуноҳлардан фориғ бўлишга чақиради. Қиёматнинг 2001 йил 1 январга “кўчирилиши” секта раҳбарларига нисбатан шубҳа уйғонишига олиб келди. Шундан сўнг раҳбарлар Канунгу қишлоғида 500 дан ортиқ ўзларининг тарафдорларини алдаб бир жойга тўплаб, ёпиб, бинога ўт қўйиб юборишган. Оммавий ахборот воситалари хабарларига кўра, тезкор тадбирларни ўтказган полиция яна тўрт жойда оммавий қабрларни топган. Умуман, бу сектанинг қурбонлари 1000 дан ортиқ бўлгани айтилади.

Аксарият мусулмонлар “секта” деганда ўрта асрларда юзага келган “Ассасинлар” ёки “Аум Синрике” каби янги пайдо бўлган соҳта диний фирмаларни тушунадилар. Бундай адашган гуруҳлар асрлар давомида бўлиб келган. XX асрга келиб улар сони, турлари чунонам кўпайдики, бу ҳол ўтмишга нисбатан хавотирли кўриниш олди.

Секталарнинг барчасига хос бўлган хусусият – эътиқод ва ибодат масалаларида дастлабки динга ёки ўзларини қарши қўяётган дин билан ихтилофда бўлишdir. Айнан мана шу хусусият уни сектага айлантиради. Таъкидлаш лозимки, ҳар бир секта ўзини “ягона тўғри йўл” деб таърифлайди.



Психологларнинг айтишича, инсонда учта табиий эҳтиёж бор. Секталар ана шу эҳтиёжларни қондиришга чорлаш орқали тузоқ қўядилар. Улар: бирон нарса билан умумийликда бўлиш; мунтазамлик хусусиятига эга бўлиш; атрофдаги инсонлар ўртасида алоҳида эътиборда бўлиш.

Америкалик психолог Сухдео ушбу масалада бундай дейди: “Замонавий жамиятда зиддиятлар шу қадар кўп ва улардан бирортасини танлаш шунчалик қийинлашиб кетганки, ҳатто инсонлар ўзларича эркин қарор қабул қилишга ҳам ожиз бўлиб қолганлар. Улар ўzlари учун бирорлар қарор қабул қилишини, ўzlари бошқаларнинг кўрсатмалари асосида оддийгина яшашни хоҳлаб қоладилар”. Айнан секталар ана шундан устомонлик билан фойдаланадилар. Улар кишиларнинг хатти-ҳаракатларини ўzlари тўқиган қатъий қоидалар доирасига солдилар. Қаттиқ интизом талаб қиладилар, бу борада шу қадар чуқурлашиб кетиладики, ҳатто оғир меҳнат, калтаклаш ва қамаб қўйиш каби жазолар берилади. Баъзи секталар раҳбарлари байъат ва қасамдан унумли фойдаланади ва бу ҳақдаги диний тушунчаларни ўзи хоҳлагандай таъвил қиласди.

Секта борки, у ҳамиша ғараз мақсадларни амалга ошириш йўлида ҳеч қандай қабоҳатдан тап тортмайди. Бу аччиқ ҳақиқатларни билатуриб, тўғри йўлдан адашган, ёлғоннинг қурбонига айланган инсонлар одам савдосига аралashiши ҳам ҳеч гап эмас. Шундай экан, ҳамиша огоҳ бўлиш, секталарга қарши курашиш, ёшларни бундан асраш ҳар биримизнинг бурчимиздир.

*Манбалар асосида  
Зуҳрахон ҲАМДАМОВА  
тайёрлади.*

## Яшамоқ завқи ширин

Кел, қизим, қулоқ тутгин, онанг айтган сўзларга,  
Одобли, ҳаёли бўл, қувонч бўлгин кўзларга.

Кўлга кирит иффату ҳаёнинг нарғизини,  
Чин муслима ҳолингда ёшинг етсин юзларга.

Ҳар сўзингни одобу ҳилм ила сўзлагин.  
Ет қаноат гавҳари бўладиган кезларга.

Сабр гултожин тақиб, савоб жавҳарин изла,  
Қалби кенглик ярашгай сендаигина қизларга.

Ўз қадрингни эл-улус қадр-қуммати деб бил,  
Виқор соҳиби бўлсанг, эришгайсан зафарга.

Маърифатли кўнгил бўл саодат нури ичра,  
Тилларингни ўргатгил “сен”ларгамас, “сиз”ларга.

Қизларнинг орқасидан яхши гаплар эшишсан,  
Яшамоқ шавқи ширин ота-онанг – бизларга.

## Нечун яшаяпсан?

- Энг роҳатли вақтинг қайси, айт?
- Куръонни тажвид-ла ўқиганим пайт.
- Қайси маҳал кўпроқ айтгум шукрон?
- Ҳаёлим Куръонга бўлса парвона.
- Қайси вақтда кўнглинг кўтаролмас мунг?
- Жаҳаннамдан қўрқиб бўлганда маҳзун.
- Қайси вақтда кўнглинг топгай ҳаловат?
- Ҳақ жамолин истаб ўқисам оят...
- Қайси вақт яшадинг гуноҳ сўз демай?
- Аллоҳ ҳаром қилган нарсани емай...
- Қачон халос бўлдинг ҳою ҳавасдан?
- Мол-дунё ўткинчи... деган нафасдан.
- Нечун яшаяпсан бу ҳолни сайлаб?
- Орифлар кўнглига саёҳат айлаб.
- Нечун қўлда Куръон кечую қундуз?
- Яратганга бурмоқ учун ёруғ юз.

*Малика ҚОБУЛОВА, Бахмал тумани*

Аёллар аслида табиатан нозик, эркакларга нисбатан қувватлари кам бўлгани боис оғир меҳнатга жалб қилинмайди. Лекин бу дегани аёлларни жисмоний ҳаратдан чеклаб қўйиш керак, дегани эмас. Улар тоқатларига яраша, кучлари етадиган юмушларни бажаришлари, ўз уйларидага ёки номаҳрам эркаклардан холи жойда жисмоний машқлар билан бемалол шуғуланишлари мумкин.

Аёлларнинг жисмонан соғлом бўлишлари учун ўзларига муносаб, маълум бир жисмоний меҳнатлар ёки машқларни бажаришларидан қайтарилемаган. Аксинча, доимо кишининг жисмоний ва руҳий саломатлигига манфаат берадиган амалларга тарғиб қилинган. Бу борада оналаримиз яққол мисолдирлар.

Ойша розийаллоҳу анҳо аёлларнинг ишсиз қолишига қарши эди. У аёлларни доимо фойдали меҳнатга чорларди.

Кўриниб турибдики, аёл киши уйда оддий меҳнат билан шуғулланиб, ўзининг жисмоний-руҳий камолотига сабаб бўладиган, кўпчиликка манфаати етадиган меҳнат билан шуғулланиб, Аллоҳ йўлида

жиҳод қилишдан-да кўпроқ ажру савобга эга бўлиши мумкин экан.

Ҳазрати Ойша розийаллоҳу анҳо бир куни бир аёлнинг қўлида урчуқнинг қадоғини кўриб қолиб: “Сенга Аллоҳ тайёрлаб қўйган нарсаларнинг башоратини бераман. Эй аёллар жамоаси! Аллоҳ сизлар учун тайёрлаб қўйган нарсаларнинг баъзисини кўрганингизда, эртаю кеч тиним билмас эдингиз. Қай бир аёл ўзи, эри ва болалари учун урчуқ йигирса, албатта, Аллоҳ азза ва жалла унга жсаннатдан мағриб ва машриқдан кенгроқ уй беради.

**Эй аёллар жамоаси!** Эрларингизга итотат қилганингиз, болаларингизга хизмат қилганингиз (яхши тарбия берганингиз) учун сизларга Аллоҳ таолонинг хузуридаги нарсаларнинг башоратини қабул қилинг! Сизлар бу дунёда мискин бўлсангиз ҳам, у дунёда анбиёларнинг хотинлари билан бирга жсаннатга биринчи кирганлардан бўласиз. Аллоҳ таоло сизларнинг кабирадан бошқа гуноҳларингизни мағфират қиласди”, дедилар (Абдураҳмон Раъфат Пошо, “Расуллороҳ атрофидаги саҳобия аёллар”).

Ойша розийаллоҳу анҳо аёллар уй ишлари билан машғул бўлиб, шунингдек, оналар эрлари ва фарзандлари учун қилган меҳнатларининг мукофотини санаб, уларни янада кўпроқ меҳнатга тарғиб қилияптилар.

Ўрни келганда, аёл киши янада тетикроқ, жисмонан соғлом бўлиши ва ўзидан чарчоқни кетказиб, кайфияти кўтарилиши учун баъзи жисмоний машқларни бажариши фойдалидир. Ҳатто бу борада оиласвий ўйинлар ташкил қилиш ҳам мумкин.

Динимиз бундай ишларни қўллаб-қувватлайди.

**Бобохон БОБОХОНОВ,**  
*Самарқанд шаҳридаги “Хўжа Нисбатдор”  
 жоме масжиди имом-хатиби*





## U zotning so'zlarini

# yaxshi ko'raman...

ni ushlab turmayman". Shayx ayrimlari qiyin bo'lgan sakkizta hadis aytib berdi va namozga kirib ketdi. Chiqqach, boladan: "Ey o'g'ilcham, meni namozdan kechiktirishingga sabab bo'lgan hadislар senga nima foyda berdi?" deb so'radi. Sufyon sakkizta hadisning bir harfini ham qoldirmasdan to'g'ri aytib berdi. Shayx bolaning zehni va fahmidan lol qoldi. Chunki uning yonida yozish uchun qog'oz-qalamи yo'q edi. Shayx sevinib ketdi va: "Ey bolakay, se ning joying masjid ostonasida emas, balki ilm halqasidadir", dedi.

Shunday qilib, Sufyon Rasululloh sollallohu alayhi va sallam hadislarini o'rganishga kirishi di. Sufyon ibn Uyayna ismli solih olimga aylan-di. Odamlarga o'rganishlari uchun Rasululloh sollallohu alayhi va sallam hadislarini rivoyat qilib beradigan buyuk shayx bo'lib yetishdi. Yigirma uch yoshidayoq Harami sharifning muhaddisi edi. Sufyon ibn Uyayna faqih olim bo'lganidan so'ng ham bolalarni e'tiborsiz qoldirmadi.

Kunlarning birida yosh bola masjidga kirib keldi. O'tirganlar unga pisandsiz qarashdi. Sufyon: "Sizlar ham oldin xuddi shunday edin-giz. So'ng Alloh sizlarga saxovat ko'rsatdi. Endi nima uchun unga bepisand boqyapsiz? Nima, sizlar kichik bo'limgaganmisiz?" dedi. So'ogra yana aytdi: «Ey Nazr, meni kichikligimda ko'rganingda edi... Yoshim o'nda, bo'yim besh qarich, yuzim xuddi dinordek, o'zim xuddi alanga kabi edim. Ko'ylagim kichkina, yengim kalta, etagim sonimgacha, oyoq kiyimim xudi sichqonning quloqlaridek kelardi. Zuhriy, Amr ibn Dinor kabi ulamolar orasida o'tirdim. Siyohdonim yong'oqcha, ko'zim qisiq va qalamim xuddi bodomdekk bo'lsa-da, masjidga kirsam: "Kichik shayxga yo'l bering", deyishardi». Sufyon jilmaydi, Ahmad ibn Nazr Hiloliy esa, kulimsirib qo'ydi.

*"Kim seni u zotdek yaxshi ko'radi?"  
kitobidan Yulduz KOMILOVA tarjimasi*

# Ғам-андуҳни кетказишининг йигирма етти йўли

Яқинда араб олими Отиф ибн Солиҳ Авғий тўплаб, нашрга тайёрлаган “Ғам-андуҳни кетказишининг йигирма етти йўли” номли китобни мутолаа қилдим. Унда аёл-қизларимиз учун жуда зарур бўлган маълумотлар бор экан. Устозлар билан маслаҳатлашган ҳолда мазкур китоб ўзбек тилига ўгирildi. “Ҳар ҳолатда яхшидир” номли янги руҳн остида ўша асар таржимасини бериб борамиз.

Суҳайб розийаллоҳу анҳу ривоят қиласиди: «Расулуллоҳ соллаллоҳу алайҳи ва саллам бундай дедилар: “Мўминнинг ҳолати ажойиб, унинг ҳамма ҳолати яхшидир. Бу ҳолат мўминдан бошқада йўқ. Унга хурсандлик етса, шуқр қиласиди, унга яхши бўлади. Мусибат етса, сабр қиласиди. Бу ҳам унга яхши бўлади”» (Ином Муслим ривояти).

Яхшилик ё мусибат етганида сабр, шуқр қилиш мўминга хос иш. Мунофиқда бу хислат йўқ. Мунофиқ дунёда ҳам, охиратда ҳам азобланади. Аллоҳ таоло огоҳлантиради: “Уларнинг моллари ва болалари сени ажаблантирмасин. Аллоҳ ўша нарсалар сабабли уларни ҳаёти дунёда азоблашни ва кофир ҳолларида жонлари чиқишини хоҳлади, холос” (Тавба сураси, 55-оят).

Қуръони карим ва Расулуллоҳ соллаллоҳу алайҳи ва салламнинг суннатларида мўминга ғам-андуҳ етишидан олдин Аллоҳ улардан паноҳ беришини сўраш, етганидан сўнг улардан қутулиш йўллари баён этилган.

Азиз ўқувчи, сизга у йўлларни баён қилишдан олдин озгина насиҳатимиз бор.

Ҳадисда бундай келади: “Сенга теккан нарса сенга тегмай қолмас эди. Сенга тегмаган нарса эса, сенга тегиб қолмас эди...” (Ином Абу Довуд ривояти). Бунга ишониш Аллоҳ таолонинг қазои қадарига ишониш демакдир.

Имом Абу Довуднинг “Сунан”ида Ибн Дайламий раҳимаҳуллоҳ ривоят қиласиди: «Убай ибн Каъб розийаллоҳу анҳунинг олдига бордим ва унга: “Кўнглимга қадар ҳақида бир йўкелди. Менга бирор нарса айтингки, Аллоҳ азза ва жалла дилимдаги йўни кетказсин!?” дедим. У зот розийаллоҳу анҳу: “Агар Аллоҳ осмонлар ва ер аҳлини азобласа ҳам, уларга зулм қилган бўлмайди. Агар уларга раҳм қилса, Унинг раҳмати уларга амалларидан кўра яхши бўлади. Гарчи сен Аллоҳ таоло розилиги учун Уҳуд тогига тенг тиллачалик садақа қилсанг ҳам, қадарга иймон келтирмагунингча, Аллоҳ таоло садақангни қабул қилмайди. Билгинки, Сенга теккан нарса сенга тегмай қолмас эди. Сенга тегмаган нарса эса, сенга тегиб қолмас эди...” Агар шунга ишонмай оламдан ўтсанг, албатта, дўзахга кирасан”, деди. Ибн Дайламий айтади: “Кейин Абдуллоҳ ибн Масъуднинг ёнига бордим. У ҳам худди ана шу жавобни берди”. Кейин Ҳузайфа ибн Ямоннинг олдига бордим, у ҳам у айтганини айтди. Кейин Зайд ибн Собитнинг ёнига бордим. У менга Пайғамбаримиз алайҳиссаломдан худди ана шу ҳадисни айтиб берди”.

Бошингизга сиз истамаган нарса тушса, Аллоҳ таоло менга яхшиликни хоҳлади, деб билинг. Пайғамбаримиз алайҳиссалом бундай деганлар: “Аллоҳ таоло кимга ях-

*шиликтин истаса, уни (мусибатларга) мубтало қиласы” (Имом Бухорий ривояти).*

Эътиқодингизни яхшиланг. Абу Хурайра розийаллоху анху ривоят қилган құдсий ҳадисда: “*Аллоҳ азза ва жалла айтади: “Мендан бандам нима умид қылса, бераман. Агар Мендан яхшиликни умид қылса, унга яхшилик етади. Агар Мендан ёмонликни умид қылса, унга ёмонлик етади”,* дейилган (Имом Аҳмад ривояти).

Оқыл одам ҳамма вақт тавба қиласы. Нафсины жиловлады. Чунки нафс ҳама ёмонликтарнинг манбаидир.

Аллоҳ таоло бандаларни гуноҳлардан поклаш ва даражаларини күтариш учун уларга турли синовлар беради. Набий алайхиссалом: “*Мусулмонга етған чарчоқ, касаллик, ташвиш, хафалик, озорланиш, ҳаттоғам билан ҳам унинг гуноҳларини Аллоҳ таоло каффорат қиласы*”, деганлар (Имом Бухорий ривояти).

Жобир розийаллоху анху ривоят қиласы. Расууллорох алайхиссалом айтадилар: “*Оғият аҳли қиёмат куни бало аҳлига* (дунё ҳаётида қилган сабрлари учун) *берилген савобларни күриб, ўзларининг терилари дунёда қайчи билан майдалақ кесилганды әди, деб истаб қолышади*” (Имом Термизий ривояти).

Азиз қардошим, фойдалы ишларга интилинг. Аллоҳ таолога таваккул қилинг, бүшашманг, күчсизланманг. Абу Хурайра розийаллоху анху ривоят қиласы. Пайғамбаримиз алайхиссалом бундай деганлар: «*Кучли мүмин күчсиз мүмінданды яхшидір. Уларнинг ҳар бирида яхшилик бор. Ўзингга фойдалы нарсага интил. Аллоҳға таваккал қил ва бүшашма. Агар сенга бирор нарса етса, ҳаргиз: “Агар бундай, бундай қилғанимда әди, бундай бўлар әди”, дема. Балки: “Аллоҳнинг қадари, истагани бўлди”, деб айт. Албатта, “агар” шайтоннинг амалини очади*» (Имом Муслим ривояти).

(Давоми келгуси сонда.)

Юлдуз КОМИЛОВА таржимаси

## Ирсият соҳаси Олимаси



Ирсий (генетик) касалликлар шифокори, биология фанлари мутахассиси Марям Мұхаммад Фатма Матар Япониянинг Yamaguchi университетида докторлик диссертациясини ёқлаган.

Матар:

- шифокорлик фаолиятини Форс күрфази давлатларида ўтқир муаммолардан бири саналган генетик касалликларни даволашга бағишилади;
- Альцгеймер касаллиги, аутизм ва бошқа оғир касалликлар устида муваффақиятли иш олиб борди;
- Даун синдромига қарши курашиш ассоциациясини ташкил этди;
- БААдаги қон касалликлари устида олиб борган тадқиқотини якунлади.

Марям Матар Дубайды бош директор лавозимини эгаллаган биринчи аёлдир. Дубай вақтли матбуоти Arabian Business Марям Матарни “БААнинг энг яхши давлат хизматчиси”, Энг нуфузли юз нафар араб аёлларидан бири”, “100 ёшгача бўлган 40 нафар энг нуфузли араблардан бири” деб номлади. “Ислом фанлари” журнали уни энг нуфузли мусулмон олималаридан бири сифатида тан олди.

2014 йилдан Матар бошланғич таълим Dubai Cares соҳасида инсон ҳуқуқлари ташкилоти раисининг ўринbosаридир.

Марям Матар асосчиси ва бош директори бўлган “БААда Даун синдромига қарши кураш” ҳамда “БААда ирсий касалликларга қарши кураш” уюшмалари 17 та давлатда ушбу касалликларга чалинган кишиларга ёрдам кўрсатиб, уларнинг оилаларини қўллаб-қувватлаб келмоқда.

Матар “Илм-фанда энг нуфузли аёл тадқиқотчи” деб эътироф этилди.

Марям Матарнинг изланишлари ҳар бир мусулмон аёл учун ибратли бир мактабдир.

Зебо ОМОНОВА



# Фарбга тақлид – юртга таҳди

Куръони каримда ўғил-қизлар бирга зикр қилинганда қиз боланинг аввал тилга олиниши динимизнинг аёлни қадрлаб, унинг ҳуқуқларига нақадар катта эътибор қаратганини кўрсатади. Бинобарин, Аллоҳ таоло бутун бошли бир сурани Нисо (Аёллар) номи билан атади.

**Ушбу суранинг 7-оятида: «Ота-она қолдириган молу мулкдан эркакларга насиба бор. Аёлларга ҳам худди шундай насиба бор. Бу насиба оз бўлсин, кўп бўлсин, Аллоҳ таолонинг фарз қилган насибасидир», дейилган.**

Ояти каримада эркак ҳам, аёл ҳам мерос олиши ҳақида сўз бормоқда. Динимиз белгилаб берган ҳаёт ҳақи, ҳуррият, эътиқод эркинлиги, фикр ва сўз ҳурлиги, таълим олиш, мулкчилик ва ҳоказоларда аёллар эркаклар каби ҳаққа эгадирлар. Эркак ва аёл ҳаққи ёки тенг ҳуқуқлилик тушунчаси динимизда қуйидагича таърифланади. Аёл кишини ўзига хос ишда қобилиятли қилган Зот Аллоҳ таолодир. Шунинг учун уларнинг аёлларга хос ишларда эркаклардан ҳуқуқи баланд бўлади. Эркакларга хос ишларда эркакларнинг ҳуқуқи аёллардан баланд бўлади. Иккисига баробар ишларда динимиз уларнинг ҳуқуқини тенг қилиб қўйган. Жумладан, Аҳзоб сурасининг 35-оятида: «**Албатта, муслим ва мусли-**

**малар, мўмин ва мўминалар, итоатли эр ва итоатли аёллар, ростгўй эр ва ростгўй аёллар, сабрли эр ва сабрли аёллар, тавозели, камтар эр ва тавозели, камтар аёллар, садақа қилувчи эр ва садақа қилувчи аёллар, рўза тутувчи эр ва рўза тутувчи аёллар, авратини ҳаромдан сақловчи эр ва авратини ҳаромдан сақловчи аёллар, Аллоҳни кўп зикр қилувчи эр ва Аллоҳни кўп зикр қилувчи аёллар – улар учун Аллоҳ мағфират ва улуғ мукофотни, яъни жаннатни тайёрлаб қўйгандир», деб марҳамат қилинган.**

Дунёда хотин-қизлар ҳуқуқларини ҳимоя қилувчи декларация қабул қилинганига 50 йилдан ошди. Лекин Ислом дини ўн беш асрдан буён аёллар ҳуқуқини ўз ҳимоясига олиб келган. Аёлларнинг сиёсий майдондаги ўрнига қўйидаги ҳадиси шариф мисол: Абу Довуд ривоят қилган ҳадисда Пайғамбаримиз алайҳиссалом Умму Ҳониъ бинти Абу Толибга: **«Сен кими ҳимоянгга олган бўлсанг, биз уни ҳимоямизга олдик. Сен кимга омонлик берсанг, биз ҳам унга омонлик бердик»**, деганлар.

Аёл киши оилада ҳам, жамиятда ҳам ўз ўрнини топиши учун унга берилган имкониятлардан тўлиқ фойдаланиши лозим. Зоро, Ислом шариатининг қоидаларига



кўра, ҳар бир аёл-қиз худди эркаклар каби илм олиш, саломатлигини мустаҳкамлаш ҳамда қўлидаги мол-мулкини кўпайтириш йўлида ҳаракат қилишга, шунингдек, обрў-мартабасини ҳимоя қилишга ва бошқа инсоний ҳуқуқларга эга. Бу имкониятлар эса уларни камолотга эришишларида асосий омил вазифасини ўтайди.

Кези келганда шуни ҳам айтиб ўтиш лозим, ҳозирги кунда айрим аёллар динимизга, миллийлигимизга зид хатти-ҳаракатларни содир этишмоқда. Уларга қараб миллийлигимизни йўқотмайлик, шарму ҳаё, ибо, ифрат, уят-андишаларимизни асройлик. Фарбга тақлид юрга таҳдид эмасми? Аслида, бутун ғарб аёлга, онага ҳурматни, эътиборни, эъзозни биз мусулмонлардан ўрганмадими? Улар бизга ўхшашга интилсин, биз уларга ўхшаб яшамайлик.

Сизнингча, бутун инсониятга ахлоқ-одоби, хулқ-атвори, сабр-матонати, ифрат-андишиаси или бизнинг момоларимиз ўrnak бўлмаганми? Ахир, бутун дунё олимлари, тиббиёт ходимлари интернет, радио, телевидениеда тор кийимларнинг заарлари ҳақида бонг урмоқда-ку! Бепарво бўлмайлик! Муқаддас динимиз ва жаннатмонанд юртимизда аёллар учун имкониятлар яратилган экан, бунинг қадрига етайлик. Оналаримизни ва аёлларимизни асраб-авайлайлик. Чунки улар келажак авлодларимизни дунёга келтирувчи ва тарбия қилувчилардир. Зоро, фарзандлари соғлом ва баркамол юртнинг келажаги порлоқ бўлади.

Аллоҳ таоло юртимизни тинч, халқимизни фаровон қилсин. Аёл-қизларимизни шариатимизда кўрсатилганидек эъзозлашимизда барчамизга тавфиқ берсин!

**Баҳрамаддин РАЗОВ,**  
Нукус шаҳар бош имом-хатиби

## Она дуоси

Тақводор она ўша вақтларда ўзлари яшетган Авжин қишлоғидаги эски масжидга боришни ният қилиб тонг оттирди. Эрталаб туриб адирга чиқди. Ҳиди ниҳоятда ёқимли оқшувоқдан бир боғлам терди-да, супурги ясади. Ўйга келиб бир челакка сув олиб, ихлос билан масжид ҳовлисига кирди. Ерга сув сепа бошлади. Бармоқлари орасидан ерга тушаётган томчилардан кўнгилга хузурбахш этадиган тупроқ ҳиди тараларди.

Негадир кўнгли тўлиқиб кўзлари ёшланди. Масжидни супуриб тозалади-да, Аллоҳдан солиҳ бир ўғил фарзанд тилади.

Дуолари мустажоб бўлиб, ўғил фарзанд кўрди.

Мустақиллик шарофати билан Қорашина шаҳарчасидаги катта йўл бўйидан масжид барпо этилди. Ушбу масжидга тақводор онанинг ўғли диний саводи бўлгани учун муаззин этиб тайинланди. Бу хушхабарни эшитган муштипар она масжидга келиб: “Ўғлим! Бу табаррук масжидга Аллоҳ сени етаклаб келибди. Ўғлим, она сифатида ҳаққингга бир дуо қиласи. Шу масжид даргоҳида доим хизматда бўл”, деди.

Масжидда илк бора жума намози адо этилгач, муаззин: “Бир зум сабр қилинг, – деди. Ҳамма бу кишига қаради. – Ҳурматли биродарлар! Энам Аллоҳдан сўраб ихлос билан масжидни қирқ кун супурди. Бугун дуолари ижобат бўлиб, яқин кунларда ҳаж сафарига жўнайман”. Кўзларидан сизиб чиққан севинч ёшларини кўрган одам борки, бу инсонга нисбатан қалбида меҳр уйғониб, қўл кўтариб дуо қилиши.

Ўйлайманки, мўътабар она сиймоси йигит-қизларга ибрат мактабидир. Мұхтарара Машира она “Тангри ором” масжида қурилиш ишларида фаол иштирок этди, ёшларга ибрат бўлди. Ушбу она дуоси билан шундай даражага етган ўғил эса мулла ҳожи Улаш бободир.

**Файзулло ПАРДАЕВ,**  
Деҳқонобод тумани, Консой қишлоғи



# Чин тұхаббат итоатдадир



Севгининг асосий шарти – итоат этиш. Инсон бирорынан бенуқсон күргани учун севади ва, шубҳасиз, унинг итоатига киради. Ҳар бир айтганини бажо қилишга жонини гаровга қўйиб бўлса-да, жидду жаҳд этади. Кейинн-чи?..

Модомики, инсон севгисиз яшай олмас экан, унда бу муқаддас туйғуни камчиликлардан холи бўлган Зотга нисор этмоқ фойдали эмасми?!

Бинобарин, гоҳо бирор одамни севсангиз, сиз ундаги фазилат деб билган нарсалар вақти келиб, кўзингизга иллат бўлиб кўрина бошлиши мумкин.

Аллоҳни севсангиз, қалбингиздаги севги ўти ҳеч қачон сўнмайди, аксинча, йилдан-йилга, кундан-кунга кучайиб бораверади ва айнан севгиниз туфайли мақомингиз юксалади.

Аллоҳни севиш эса, Унинг Ҳабибини севиш билан событ бўлади.

Аллоҳ таоло бир ояти каримада Пайғамбар соллаллоҳу алайҳи ва салламга: «Сиз: «Агар Аллоҳга муҳаббат қилсангиз, бас, менга эргашинг. Аллоҳ сизга муҳаббат қиласидир ва сизларнинг гуноҳларингизни мағфират қиласидир», деб айтинг. Аллоҳ Ғафур ва Роҳиймдир» (Оли Имрон сураси, 31-оят), дея амр қилди.

Саҳобалар Расулуллоҳ соллаллоҳу алайҳи ва салламни жондан ортиқ севдилар ва комил ишонч билан ортидан эргашдилар. Шундай эдикни, асҳоби киром Расулуллоҳга яқин бўлиш учун юрган йўлларидан юрар, дам олган ерларида дам олар, у зотга кўнгил

севгисини ҳар фурсатда итоат билан изҳор этардилар.

Ҳазрат Али каррамаллоҳу важҳаҳудан “Расулуллоҳга бўлган севгиниз қандай эди?” деб сўраганларида: “Расулуллоҳ соллаллоҳу алайҳи ва саллам бизга отамиздан, онамиздан, болаларимиздан ва молларимиздан ҳам севимли эди. Ҳатто у бизга иссиқ кунда муздек бўлиб турган сувдан ҳам севимли эди”, деб жавоб бердилар.

Нақадар мукаммал имон, оташин муҳаббатки, томоқни қуритган, жигарни қовурган чўлнинг қайноқ қумлари ҳароратида куяр экан, икки нарсадан бирини танлашни айтсалар: куйган бағрини салқинлатадиган сувними ёки чанқоқ зўридан оғзи қақраса-да, кўнглини шод этган Пайғамбар алайҳиссаломнинг ортидан эргашмоқними? Улар иккинчи йўлни афзал билар эди.

Улар шундай севдилар. У зотнинг ишқини кўнгилларининг энг мумтоз ерларига жойладилар. Абадиятга ишондилар, ёнларида экан, қалбининг тубида у зотнинг муҳаббатини ҳис этдилар... Бир нафас ёнидан айрилганларида эса соғинч ва ҳасрат билан дучлашдилар. Илло, у зотга итоат этмоқ – Аллоҳга итоат этмоқ эди. Парвардигор ояти каримада: “Ким Пайғамбарга итоат қилса, Аллоҳга итоат қилган бўлур...” (Нисо сураси, 80-оят), дея марҳамат қилиб, қалби уйғоқ инсонлар юрагига у зотнинг ишқини жойлаб қўйган эди.

Аллоҳ таоло яна бир ояти каримада: “Батаҳқиқ, сизлар учун, Аллоҳдан ва охират кунидан умидвор бўлганлар учун ва Аллоҳни қўп зикр қилганлар учун Расулуллоҳда гўзал ўрнаклар бор эди” (Аҳзоб сураси, 21-оят), дея амр этди.

Ҳар бир инсоннинг ҳаётда ҳавас қиласидан бир қаҳрамони бўлади. Мўминнинг ўр-



нак оладиган ягона қаҳрамони эса, инсон зотининг энг шарафлиси – Пайғамбаримиз алайҳиссаломдирлар. Оятда ишорат этилгани каби “**Аллоҳдан ва охират қунидан умидвор бўлганлар ва Аллоҳни кўп зикр қилган**”лар ўзларига кимнинг ўрнак бўла олишини кўз олдига келтиради. Севмоқ – эргашмоқдир. Маъшуқнинг ҳар бир амалига, отган одимига эргашмоқ... шу жиҳатдан, севги мунтазам саъй-ҳаракат ва парваришни, юксалишни талаб қиласди.

“Севги фақат сўз ва туйғудан иборат бўлса эди, рўза ва намозга эҳтиёж қолмас эди”, дейди улуғларимиз. Демак, Пайғамбаримизнинг йўлларидан, изларидан юрмоғимиз, амаларимизни у зотнинг суннатларига таяниб бажармоғимиз кепрак. У зотга эргашмаганлар эса бошқаларга эргашиб адашиб-улоқиб кетади. Бу ҳолни Умар розийаллоҳу анху: “Ишонганингиз каби яшамасангиз, яшаганингиз каби ишона бошлайсиз”, деб тушунтирган.

Севгининг мукофоти жуда буюк – абадий биргалик.

Ҳазрат Пайғамбар алайҳиссалом ҳузурларида Савбон розийаллоҳу анху Аллоҳнинг Расулига маҳзун бир қиёфада боқиб ўтиради. Унинг ҳазинлиги Пайғамбаримизнинг эътиборларини тортди.

– **Савбон! Сенга нима бўлди?** – деб сўрадилар.

Ҳазрат Савбоннинг юрагини қуидираётган бир андишаси бор эди – Севгилисидан, яъни Расууллоҳдан айро тушмоқ. Бу айрилиққа чидай олмас эди.

– Ота-онам, молу жоним сизга фидо бўлсин, ё Расууллоҳ! Ҳасратингиз мени ёқиб-қовурмоқдаки, сиздан айро кечирган ҳар куним менга ҳижрон азоби бўлиб кўрин-

моқда. Дунёда шундай бўлса, охиратда нима бўлади, дея дардим ортиб боряпти. У ерда сиз пайғамбарлар билан бирга бўласиз. Менинг эса ҳолим не кечиши, қаерда бўлишим маълум эмас! – деди.

Ҳазрати Пайғамбаримиз Савбон билан биргаликда асҳобига ва қиёматгача келадиган умматларига мужда бердилар: “**Киши севгани билан бирга бўлади**” (*Имом Бухорий, Имом Муслим ривояти*).

Мазкур ҳадиси шарифдан аён бўладики, ҳаётимизда кимни ёки нимани қалбимизга сulton айласак, охиратда у билан бирга бўламиз. Мехрибон Аллоҳ ва Ҳабибининг севгисини қалбимизга жойласак, Пайғамбаримиз кўрсатган йўлдан чалғимасак, қиёматда у зот билан бирга бўлиш баҳтига эришажакмиз. Бундан улуғсаодат борми?!

Аёл кишининг Аллоҳга ва Расулига муҳаббати ва итоати, энг аввало, эрини яхши қўриши, унга итоати, фарзандларига чиройли тарбия бериши, одоб-ахлоқни ўргатишида намоён бўлади.

Ояти каримада “(Аёллар орасида) солиҳалари – бу (Аллоҳга ва эрига) итоатли, ғойибга Аллоҳ сақлаганича ҳимоятли (яъни, эрларининг сирлари, мулклати ва обрўларини сақловчилардир)” (*Нисо сураси, 34-оят*), дейилган.

Мазкур ояти карима ва ҳадиси шарифдан аён бўладики, оиласаги муҳаббатнинг асоси ҳам Аллоҳга ва Расулига боғланиб кетиб, шу асосда бутун жамият ўртасида муҳаббат риштаси пайдо бўлади. Табиийки, бундай жамият аъзолари соғ туйғулар ардоғида баҳтиёр ҳаёт кечирадилар.

**Дамин ЖУМАҚУЛ  
тайёрлади.**



**Аҳмад Лутфий Қозончи**

# Ўгай она

*(Бошланиши олдинги сонларда.)*

Бир куни уни икки болали бева эркакка сўраб келишди. Хотини бир йил бурун ватот этган бу одамнинг болалари паришон бир ҳолда қолганди. Бувиси, яъни мархум хотиннинг онаси бу паришонликни бироз бўлса-да камайтириш учун анча уринди, лекин ўзи ҳам хасталаниб қолди. Шундан сўнг Одилбек болаларининг аҳволини бироз бўлса-да яхшилаш умидида иккинчи бор уйланишга истар-истамас рози бўлди.

Одилбек намозхон, хушфеъл, хушбичим, файзли инсон эди. У ҳақда эшитилган қисқа маълумот – шу. Фотиманинг онаси бундай турмушга рози бўлмайдиганга ўхшарди.

Икки етимга қараш осон бўптими?! Уни муаммолар камроқ, ҳар жиҳатдан тўкин оиласиз узатмоқчи эди. У тўғрида қизи билан маслаҳатлашди:

– У одам яхшиликка яхши эмиш, аммо икки етими бор, қизим, нима қиласан?

– Уларга фарзандимдай қарайман, она бўлиб тарбиялайман.

– Она бўлиб қараш осонми, қизим? Санниҳа нима қилди? Исмоил еган таёқларни кўрмаяпсанми? Бола шунча зулм кўряпти, Санниҳа шунча гуноҳ орттирияпти. Хўш, Санниҳаҳоним оналик қилдими, буни истадими, бунга тиришдими? Келганининг учинчи қуниёқ Исмоил уйдан йиғлаб чиқмаганмиди? Қачон Исмоил Салмадай гўзал, тоза либослар кийди? Қачон Салма билан тенг кўрилди? Салмага қарашдан ортиб, бирор марта дўйстлари билан ўйнадими? Аминманки, у уйда Салма Санниҳаҳонимнинг боласи, Исмоил эса унинг хизматкоридай кўрилади. Ҳатто хизматкорга ҳам бундай муомала қилмайдилар.

Қизим, бир нарса менга маълумки, етимнинг қаҳри қаттиқ бўлади. Қанча уринма, ўзингни уларга она сифатида тан олдиролмайсан. Сенга бир нарса айтайми? Етим-есирсиз, қайнонасиз, боласиз оиласиз келин бўлишинг керак. Нега ўзингни заҳматга урасан, эл қилмаганни қиласан?

– Хўш, унда бу болалар нима бўлади, она? Биронта ўзини билмайдиган келиб ҳар хил зулмлар ўтказса, бечора болаларнинг ҳоли не кечади, уларнинг айби нима, она?

– Сенга нима, Фотима? Бирорнинг боласи бўлса, ўйлаган нарсангни қара. Қанча чидайсан, бир ҳафта, бир ой сабр қилдинг, хўш, охири нима билан тугайди? Бир кун келиб бошқача ўйлаб қоласан. Пушаймон бўласан, ҳаётинг сўнгигача уларнинг дардига ўралашиб ўзингга жабр қиласан, ё Санниҳага ўхшаб, оғизларига уриб, ташқарига қувиб, ҳайдайсан. Бундан бошқа йўл борми?

– Бор, она. Уларни ўз фарзандимдай ўстириб, савоб олиш бор. Ўз боласини парвариши қилиш ҳайвоннинг ҳам қўлидан келади. Инсон бир поғона устун бўлиши керакмасми? Инсоннинг ҳайвондан устунлиги ғарип етимни боласидай бағрига боса олишида эмасми? Зулмнинг ҳар қандай тури ҳам ёмон, аммо етимга қилинган зулм золимни, яъни зулм қилгувчи инсонни ҳайвондан пастроқ тушириб кўйса керак.

Бу суҳбат Фотиманинг истаги амалга ошиши билан якунланди. Қизини сўратган бу одамнинг ёмон одам эмаслигини билган отаси ихтиёрни Фотимага берди. Етимларни парваришилаш Фотиманинг қўлидан келади. Агар Фотима хоҳлаётган инсон ахлоқий бузук, ичкиликбоз, қиморбоз, дин душмани бўлса, қизини унга бермаслик



отанинг бурчи. Акси бўлса, Фотимани ўз ихтиёрига қўйиш керак. Шу сабабдан совчиларга мувофиқ ва муносиб жавоб берди.

Байрамдан бир ойлар кейин Исмоилнинг аҳволини кўрганлар унинг секинаста ўнгланиб бораётгани ҳақида холоса чиқаришлари мумкин эди. Баъзан отаси уни бозорга олиб борар, баъзан Исмоил ўртоқлари билан ўйнарди. Уйда яна уни калтаклашяптими, йўқми билиб бўлмасди.Faқат илгаригидай таёқ ейишлар ниҳоясига етган эди. Буни биринчилардан бўлиб Фотима англади. Аслида Фотиманинг икки етими бўлган кишига турмушга чиқишига сабаб ҳам Исмоил эди. Тўғрироғи, Исмоил чеккан изтиробларнинг унинг кўнглида қолдирган теран таъсири эди бу. Икки етимнинг кўнглини олиш – уларни золим кўлига тушишдан кутқариш эди унинг нияти. Йўқса, Фотимадай ҳам руҳий, ҳам жисмоний гўзаллик соҳибаси, ишchan қизга уйланмоқчи бўлганлар кўп эди. Яна кўплаб топиларди ҳам. У уйланган одамга турмушга чиқаркан, унинг марҳум хотини хотираларига боғланиб қолиши мумкинлигини билгани ҳолда, бу гўдакларни кутқариш фикрида эди.

Модомики, бўлғуси эр муросали инсон экан, муаммо йўқ ҳисоб. Ҳар ҳолда ўлган билан тирик бир эмас. Энди уйланган хотинини ҳам севади, ҳурматлайди. Бунинг устига, Фотима эри бўладиган одамга биринчи хотинига нисбатан ҳурматни унугшини таклиф этадиган, уни эсидан чиқармагани учун хафа бўладиган, тирғаладиган қиз эмас. Ўзи бир вақтлар кичиклигидан боқиб катта қилган мушуги йўқолганда унинг хотирасини кўнглидан чиқариб ташлаётмаган Фотима икки боласини омонат қолдирган бир инсонни унугтиб юборишини тасаввуринга сифтиrolмасди. Бу тўғридан-тўғри муруватсизлик бўларди.

Ўзининг у хонимни унугтирадиган нима бор? Балки у хотин кўп устун, савиали, фазилатли бўлгандир. Уни унугтиш – у қолдирган гўдакларни ҳам ёддан чиқариш демакдир.

Ҳолбуки, Фотима бу хонадонга шу гўдакларни деб келмоқда эди, токи улар унугтилмасин, изтиробда қолмасин. Фотиманинг икки етими бор одамга тегишига рози бўлишидан қариндош-урӯғ беҳад ҳайрон бўлиб қолди. Улар болани эплаш мушкуллигидан сўзлар, ўйламасдан иш тутилаётганлигини айтиб, куйинишарди. Ёш, келишган у одамнинг қусур ва камчиликлари деярли йўқ, аксинча, у бир талай фазилатларга эга. Қариндошларнинг баъзилари дўстона ачинишиб, озорланишар, баъзилари эса қарор қабул қилган Фотимани айлашар эди. Ҳали ҳам фикридан қайтиш учун кеч эмаслигини, бу энг тўғри йўл эканини айтишарди. Онаси келганларнинг дашномларига жавобан:

– Қанча ҳаракат қилмай кор қилмади, тушунтиrolмадим. Не қилай, қўлимдан нима ҳам келарди. Ана, ўзингиз чақириб гаплашинглар, – демоқдан бошқа чора тополмасди. Улар Фотиманинг ўзи билан гаплашишди:

– Фотима, сени яхши кўрганимиздан куйинами. Бўлмаса, бизга нима? Ке, ўзингни қийнама. Хоҳласанг, поччанг аралашиди. Кеч бўлмасдан олдини олайлик.

Фотиманинг юраги сиқилди. Нега ҳар ким аралашаверади? Борадиган, яшайдиган ва буни кўнгил ризолиги билан истаган унинг ўзи-ку. Ҳар ҳолда ўз зарарини ўзи ҳам уларчалик ўйлар ва тушунарди.

– Хола, – деди, – мени яхши кўрганингиз учун гапиряпсиз, аммо менинг қарорим қатъий. Менинг мақсадим икки гўдакка қараш ҳамда уларни изтиробдан, мashaқатдан қутқариш. Мен пушаймон қилмайман. Бунинг учун беҳуда азият чекманг.

– Ишқилиб пушаймон бўлиб қолмасанг бўлгани, Фотима!

– Парвардигорим мени уялтирмас. Ёмон иш қилмоқчи эмасман-ку!

Сўз шу ерда тўхтади.

(Давоми келгуси сонда.)

**Йўлдош ЭШБЕК** таржимаси



## Овқат қачон шифо бўлади?

Одатда, ўзбек оналари қизларига ёшлигиданоқ ошхона одобларини ўргатиб боришида. Бу анъана момоларимиздан мерос бўлиб қолмоқда.

Аёл-қизларимиз, оналаримиз ўргатганларидек, таом тайёрлашдан аввал овқатга беҳосдан соч толаси тушиб қолмаслиги учун бошларига рўмол танғиб ошишлари керак. Сўнгра қўлларини ювиб, узук каби тақинчоқларни ечиб қўйишни унутмасликлари зарур. Идиш-товоқнинг озодалигига эътибор бериш, қозонга ёғ қўйишдан аввал “Бисмиллаҳир роҳманир роҳийм”ни айтиш муҳим ҳисобланади.

Улуғларимиз қадимдан таом тайёрлашга алоҳида эътибор қаратишган. Аввало, масаллиқларни имкон даражасида ўзлари етиштиришган. Сўнгра таом тайёрлаш жараёнида зикр айтиб, Қуръон оятларини ўқиб туришган. Шунингдек, ғазабланган ҳолда овқат пиширишмаган. Бугунги уй бекалари ҳам нафақат ташки озодаликка эътибор қилиб, балки руҳий томондан ҳам яхши ўй-фикр ила, зикру шуқр билан таом пиширишса, тайёрлаган овқати ҳам мазали, ҳам шифобахш бўлади...

Овқатланиб бўлгач, дастурхонни йиғишириш, коса-товоқларни ювиш зарур. Йўқса, ҳар хил ҳашаротлар ва кўзга кўринимас микроблар тушиб, турли кўнгилсизликлар юзага келиши мумкин. Бу хусусда Пайғамбаримиз алайҳиссаломдан қўйидаги ҳадис ворид бўлган: “**Кеч киргач, ... Аллоҳнинг номини зикр этиб, мешларингиз (офзи)ни боғлангиз. Аллоҳнинг номини зикр этиб, идишларингиз устига бирон нарса бўлса-да, ташлаб қўйинг...**” (Мұттафакүн алайҳ). Кундузлари ҳам сув ёки бошқа нарса солинган идишларнинг устига “**Бисмиллаҳ...**” айтиб, бир чўпни бўлса ҳам, ташлаб қўйиш керак.

### 3. АБДУЛЛАЖОН қизи



## Укропнинг фойдалари

- қон босимини меъёрга келтиради;
- ич қотишини олдини олади;
- сийдик тута олмасликка даво;
- үйқусизликка даво;
- йўтал, бронхит ва томоқ оғриғидан ҳалос этади.

### Тайёрлаш ва қўллаш усули:

1 ошқошиқ укроп уругини қайнаган сув қўйилган чойнакка солинг ва чойнакни сочиқча билан ёпиб дамлаб қўйинг. 40 дақиқа кутинг!

1 ҳафта давомида ҳар куни 7 маҳал 3 ҳўпламдан ичинг. 2-3 ойдан сўнг муолажани яна тақориласангиз бўлади...



Абдуқодир САТТОРОВ,  
шифокор

## Лимон – тозалаш воситаси



**1. Човгум тагида қасмоқ йиғилиб қолса, яримта лимонни майдалаб солинг-да, устидан 1 коса сув қўйинг. Қайнаб чиққач, ярим соатдан сўнг чайиб олинг. Чўқмалар осон тозаланади.**

**2. Микротўлқинли печга лимон пўстини солиб, устидан озроқ сув қўйинг-да, 5 дақиқага қолдиринг. Сўнг лимонли сув ҳосил қилган намлиқда микротўлқинли печни осон тозалаб оласиз.**

**3. Лимон мевасини ишлатиб бўлгач, пўстини чиқинди идишига суртиб қўйинг. Ёқимсиз ҳид безовта қилмайди.**

**4. Лимонни иккига ажратиб, ичидағи мевасидан бўшатинг. Кичик ўлчамга келтирилган шамчаларни жойлаб, кечки маҳал ярим соатга ёқиб қўйсангиз, майда ҳашаротларни ҳайдаб чиқаради.**

**5. Лимон пўстини 2-3 кун очиқ ҳавода қолдирсангиз, қотади. Сўнг блендерда майдалаб олсангиз, пишириқларга таъм беришда фойдаланишингиз мумкин.**

**6. Пол артаётганда челякдаги сувга лимон пўстини солиб қўйсангиз, инфекцияларга қарши восита ва ёқимли ҳидга эга бўласиз.**

Зебохон ПЎЛАТОВА тайёрлади.

